

MULUKU ONNIRUKUNXA

MUUPUWELO AWE

VANAASIWA MASU AWE?



Nrowe nuuramihe muru ahu. Pwiya Yesu Oophentiwa, hiyo noothukumana-tho mwa Nsina Nanyu, ni owehererya wuulupale wa omwaraxiwa wa Owerya woovaha ekumi wa Muluku wira onisuwelihe mukhalelo ahu ni opuro, ni othokererya wahu, siryaahu atthu oowiiythaniwa, oovalaanihiwa ni olumwenku, oowiivahererya wa Muluku. Munivahe, Pwiya, ohiy'ula, wira iparakha sa Muluku sinihoolele ni sineettiherye mwa itthu siniiraahu wala sinihimyaahu, wira siruuhele nttittimiho ni ovuwa wa Nsina Nanyu. Amen.

² Miyo kootteeliwa murima otthikela mukereja ohiy'ula ni okhala ni nyuwo atthu oophenteya. Ni koosuwela wira vaaviha, masi kinoomalaru owiithana amwaar'aka, kinoona wira ti miloko mithanu na mixexe ni etthu iwe, miloko mithanu na mixexe ni thanu wala miloko mithanu na mixexe ni thanu na mosa wala etthu siiso, ni onnivihaxa ovikana nno. Tivo koopacerya olimalela mukhalelo w'okathi wooviha vano. Tivo, masi kootteeliwa murima okhala va otapernakulu okathi ula wooreera wa Paasikha.

³ Ni nkikhanle ohimyaka wira kinoovekela muswammaha mwaha wa, Mutthaka ole woolekelaxa voosis'ula, masi miyo. . . Waari, nkaatthuna—nkaantthuna omaliha ovilela wanyu vano okela-tho mwa yoowo ohiy'ula. Masi miyo—miyo kaatthuna wo—wooruuhelani Mutthak'owo nyuwo, wira nyuwo mwa epante wa ohihimuwa nno. Munnona? Ni muhivelavele-tho mwaha wa Yeeyo, moone. Mutteeliweke murima paahi mwaha wa Yeeyo! Khiyaavo etthu, hata nipuro, enwerya woovalaanihani ni Yeeyo; hat'etthu; Muri oolipa vohimala Momweneni mwa Muluku. Okathi Muluku ootthintte-aweni Ekanyeryo Awe mwa nyuwo, nyuwo muri mpakha woomalelani w'ekiseryo.

⁴ Kuveerunu ahela ekanyeryo nihuta, alipa a xiporo yahela ekanyeryo vamukhora, evakawu iyo khekhanle opatiliwaka mpakha ophiya onrowaaya.

Okathi Muluku onihelaawe Ekanyeryo Awe mwa mutthu, nto Ekanyeryo ti Erooho Yoowaarya, okathi Owo onimutthittaawe mutthu siiso, owo onrowa w'ekiseryoni wawe Ehinimala. Owo khonkhalakhala nnakhala, atthikelakatho, ottuli. Okhala wira muupuwele, aEfeso 4:30 anihimya

wira, “Muhiriipihe murima Erooho Yoowaarya ya Muluku, yeeyo mutthittiwaanyu ekanyeryo okathi wothene.” Moone, nyuwo mootthittiwa ekanyeryo mahiku othene. Mootthittiwa, Voochimala, Momweneni mwa Muluku, ni Erooho Yoowaarya. Vano muupuwele yeeyo!

⁵ Vano, nyuwo, xetwani onimoomanani ekutu, ni onimooleelani sothene, ni owootheryani, ni—ni weererya owuupuwelihani wira khamuhiyo. Masi muhimwiiwelele.

⁶ Vano, moosuwela wira moovira mookhwaani khuphwanya Ekumi. Nyuwo moosuwela wira itthu saatonko anyu omphenta, khamumphenta-tho. Moosuwela wira muhaamini Masu othene a Muluku. Moomoona Muluku ovara muteko eriyari ahu, woohikhala... Iyooniheryo soohivonyeya wira Owo ti “MIYO KOOKHALA” muulupale. Nyuwo moowehe wira sothene sitonko ohimmwa mwa Nsina Nawe, khiyaavo etthu emosa etonko olaleeriwa mwa Nsina Nawe ehiiraneiyee voolikana siiso ehimmwale-aya. Hata ni siyensiya, exornaale, elatarato, maakina a ilatarato, anamalepa, sothene sikina, sihaana osuwela. Moone, voochicala sinto anootthuna wala nnari, Muluku onnaakhanyererya wira, khula enamuna, moone, wira esuweliwe.

⁷ Vano, nryeene nikhuru naamukhaani. Muupuwele, khanihiyo nikhuru nuulupale Owo onrweelaawe. “Muhoove, nikoto naamukhaani; Atith’inyu ohaasivela...” Munnona?

⁸ Kintthuna koohiyeryeni nuulumo, nootutuxa, okathi vakhani nihinatthi okhalana okhalihwa wa murumeyi. Ni ela ti yootutuxa saana, masi wira musuwele paahi. Vano, nkinihimya wira nla ti nummero noolikana, masi kaatthuna koohiyeryeni yeela.

⁹ Nkisuwenle sinto atthu mu aatoko woona otakanxiwa mixovo sa imompe. Yeeyo, miyo kihinaamini aka, masi miyo kihoona yiiriwaka. Ni koowoona ekuxaka ekhasa ya yoolopwana, yoophiyerya paahi, wira ekwanniyiwe ni eyuuma, ntoko nikoko naamukhaani na niino, ni ohela vanipattuuxani na maarimore. Ni orukunxa ilenti iye sinaacererya, nkisuwenle vaara vakavi, mpakha ekhasa eyo... Vaavo mwahaarow’anyu oweriya woona etthu ni niitho n’ephattu, nnakhala ni elenti pure. Masi yaacereriwa vale, vaara emiya wala vaara emiya ni miloko mithanu, munoowerya woona mmuttoittoiini mmwe nikhaani, na ekhasa, khino iropo sikhaani miloko mithanu mpakha emiya situphaka. Nave-tho, mwa oothiyana onoorwa mwaattelo mmosaru wa mooce, mwe—mw’ekhasani. Vano, okathi awo ani—anthukuman’aya, vano, piili soopacerya sinkuman’aya ni oluttana...

¹⁰ Ori mmosa paahi w’ale emilyawu onrowa okhala. Mootoko wuupuwelele yeeyo? Iyo iropo soolikana, ni mooce oolikana, sothene soolikana, masi eri emosa paahi enrowa okhala. Ni

eyo khenilamuliwa ni ole onixintta ni ophiya voopacerya. Okhala wira, imaara sikina nooce, nimphwanyaneya ottuli saana, nto eropo yaamuweryaneya okhala eriyari y'ekhasa, nto sinoovira emosa vasulu va ekhwaaya. Ontthuneya Osuwela wira esuweliwe sinto onrowa okhala mwaana mulopwana wala mwaana muthiyana, ooxeerya maihi, ooriipa maihi, wala ekina. Onkhala othanla wa Muluku. Khivanweryaneya okhala etthu ekina. Othanliwa!

¹¹ Hata mwa oyariwa w'ephattu, onkhala othanliwa, sinto onrowa okhala mwaana mulopwana wala mwaana muthiyana, wala khula etthu enrowa okhala. Nto okathi eropo eyo yaamukhaani enkelaaya munooeni mu naamukhaani, nto miila mikhaani khumora, onipacerya muthana wa mwaana wa etthu enrowa okhala; mwaamunama, mwaana, wala etthu p'itthu. Nto iropo iye emilyawu sikina. . . Mooce emilyawu, iropo emilyawu, nto emosa paahi t'enkhala ekumi. Sothene soolikana, masi Muluku onthanla mwaha wo otthoma ole onrowa okhala, nto sikina sinoopweteya. Mmosa varyari va emilyawu emosa!

¹² Okathi Isarayeli okhumaly'awe wEjitu, awo othene yaaminni mutthaka wa profeta mmosa. Awo yaahoona ithoonyeryo sa Muluku, ni Moise. Khula mmosa aahoona. Ni othene yaahikhuma wEjitu, khweetta eviraka Ephareya Yooxeerya, ni yaahipatisiwa ni Moise. Othene yaahoona owerya wa Muluku waamphiyenrye, okathi owo oipale-awe Muroohoni; ni okathi Miriyamu oopalyaawe ekoma, atthimakaka mukerekhere wa olimani. Khula mmosa a awo, khula ohiyu, yaanilya emana ya naanaano, ya wirimu yaakhuma osulu. Khula mmosa a awo aahiwurya vaMwala vale wa erooho waamaniwe. Ni yaahikhala atthu imilyawu piili yaakhumme wEjitu. Akavi yaaphiyale muttethe wa natiri? Aili. Mmosa wa emilyawu emosa! Othene awo ari vayi? Yesu ohimnye wira yaahipweteya. "Axitiith'inyu yaahilya emana mothakoni, okathi wa miyaakha miloko miraru, nto Miyo kinooleelani wira othene aya ahookhwa."

¹³ Vano aakhala aKristu oophiyaka imilyawu imiya thanu mulaponi ohiy'ula, owaalaka aKatolika, aPrustante, ni othene. Vaakhanle wira Yesu aamurwa Mookuxiwani, voothariha ele kimanlyaka ohimya, yaamukhala imiya thanu yaarowa ohaleela molumwenkuni ohiy'ula, Mookuxiwani. Ni eyo khino ti mahiku othene, naalikelaka ilapo sothene, ahinsuweliwa. Tivo vaamuweryaneya okhala okathi p'ukathi, moone.

¹⁴ Oh, aKristu, nrowe niitthukele saana ikaruma sa Muluku. Nrowe niire sothene sinsuwelaahu, wira nimurumeele Yoowo, nimphenteke Yoowo, ni olipelela okathi uwo muulupale.

¹⁵ Vano, khenrowa okhala imilyawu sinci-ene ni mittitthi sinrowa okhuma munlokoni ni okela. Khe—khekhanle okhalaka siiso.

Vano, muupuwele, khula nihiku ninnimala nloko nimosā, khula nihiku. “Ntoko saary’aya mahiku a Nowe, siiso-tho enookhala orwa wa Mwaana a mutthu, minepa s’atthu athanu ni araru yooonwe aya ni maasi.” Masi khula nihiku onnimala okathi wa miyaakha miloko mixexe sa mutthu, wa akina. Munnona? Ni khula nihiku, anci-ene annithittiwa ekanyeryo Momweneni. Nihiku nimosā, nihiku nookiserya ninoophiya.

Nrowe nikupali vano, niryeene ni muupuwelo wooloka. Ni mukereja, ni eriyari y’atthu, vaavo Erooho Yoowaarya ehireere-aya wiisuwanyeiha Eneene ni hiyo, nrowe nikupali wira sothene siri saana, ni sikhale saana, ohoolo Wawe.

¹⁶ Muheemele. Muhimumule, othana n’uhiyu, mpakha Owerya iwe woovaha ekumi wookumiheni mwa itthu sa molumwenkuni, okela Momweneni mwa Muluku. Ni nyuwo vekeekhai mukelihiwe Momweneni mwa Muluku ni nvahiwa ekumi ni Erooho ya Muluku, otthapa xeeni! Ni maithori a ohakalala hiyo naahaana okokhōra, othana n’uhiyu, nimuxukhuruku Muluku mwaha wa etthu Owo iiraly’awe.

¹⁷ Ohiy’ula nookhalana orukunuwa vakhani mmutekoni w’okokhōrela. Nookhalana munna mmosa ooreera murima va, Munna Capps. Owo oonirweela okhuma ekereja Nasareeno. Ni kinoona wira ti siiso, Munna Capps? Owo ontthuna ohiy’ula okhalihiwa murumeyi ni hiyo, ni nimwiixaatheryaka matata.

¹⁸ Khanirina ipaphelo soonvaha-tho mutthu, ninaamwi nisuweliwaka ntoko. . . Naamuwerya okhalana ipaphelo, masi ninnaamini wira murumeyi, ookhalihiwa vekeekhai, ipaphelo sawe siri Wirimu. Munnona? Ni owo—owo ookhalana ihakhi so omulaleya Bibilia vakhalaru wira Muluku onnisuwanyeiha makhalelo awe ni Bibilia. Hiyo ninnaamini wira ti ipaphelo sawe sa onamuhupi.

¹⁹ Nto, vano, Munna Capps ookhalihiwa vootthuneya mu—mukereja Nasareeno, masi ohiy’ula owo ontthuna wira ahumu, ni akina, amwiixatherye matata wira emukhalihe murumeyi, wira akuxe Mutthaka ola. Etthu xeeni yo ominyala!

²⁰ Miyo ki—miyo kihiiwa ihapari okhuma okathi oryaaka oTucson, ni ihapari sooreeraxa, sa Munna Capps va mwa omukhaliherya wawe Munn’ihu oophwanelaxa Neville, yaawo ankhapelela muthuko wa Waarya vookhomaala ntoko axilopwana ala aili sikhanyaya okhapelelaka. Hiyo noomwiixaatherya matata Munna Neville, masi khanimwiixaathenrye Munna Capps. Ni kinthuna wira ale akhanle arumeyi, Munna Jackson n’akina, awo yakhala vaava, ni Munna Ruddell ni ahumu a ekereja va, awo arwe vasulu va minuutu vakhani paahi vano, ni emwiixatherye matata Munna Capps. Ni e . . .

²¹ Vano hiyo ninniphwanya, mBibiliani, wira ti siiso awo yiiralyaaya, awo yaawwiixaathenrye matata nto khwaamwarya.

Nto ti siiso awo yiiralyaaya ni Timoteyo. Khwira, “Mwaha wa yoovaha ela yaari mwa nyuwo, yaarina apiipi anyu Loite. . .” Awo yaarimoona eyo, wira yaahikhala yoovaha mwa mulopwan’owo, jaarwiiye mwa yoowo ni ahumu, mwaha wo omwiixaatherya matata.

²² Vano, axinna a nihiku nookiserya, axinna a epula yookiserya, aakhala, oowiitepanya, mwa yeeyo. Awo yuupuwela wira yaanvahale yoovaha, yiiraka yeeyo. Nnari, yoovaha yiira ekhanle mwa yoowo, nto awo yaamwiixaathenrye matata paahi ntoko olipiherya wira awo yanaamini wira Muluku iira ohenle-ene yoovaha mwa yoowo. Nto awo khulipiherya, emwiixaatheryaka matata.

²³ Nto axilopwana ala va mukereja mu, kinaamini aka wira aakhalaniwa mmunepani mwaya ni Owerya Wawe woovaha ekumi; nyuwo axinna mwarwa naanaano va, Munna Ruddell ni othene akina muri mukereja mu, ni ahumu ni ikereja axinna vakhiviru, wira nimwiixaatherye matata Munna Capps, wira akhalihewe ni olipiherya wahu, ohoolo wa muthukumano ola, ni oveleelihiwa wira alaleye Ehapari yooreera ya Pwiya Yesu, khula nipuro Muluku onrowaawe omwiitthana. Owo onkhala. . .

Owo ti mmosa a hiyo, mwaha wo Oyariwa. Owo mmosa a hiyo okhala wira ohaamini Mutthaka. Owo mmosa a hiyo okhala wira—wira owo onneemererya Ekeekhai ya Masu. Ni nintthuna wira Munna Capps akhalihewe murumeyi vootthuneya, ohoolo wanyu, aixaaatheriwaka matata, wira owo mmosa a hiyo.

Vaareera, Munna Ruddell, Munna Capps, Munna Neville. Munna Junior Jackson, aakhala akina wa arummwa va, miyo nkisuwenle arixa akavi. Miyo nki. . . Kinooona wira awo aakhalana miteko saya s’okokhorela ohiy’ula. Tivo murwe va, Munna Capps.

Vano ori yayi Munna Hunter ni ale a oNova Yorke, miyo. . . Munna Anthony? Kinooona wira aatthika. [Munna Neville oniira, “Munna Anthony ori ottuli iwe.”—Mol.]

Khula mmosa a nyuwo akina ori va, ori ni hiyo, vano, naamutteeliwa murima nyuwo orwa va ni weemela ni hiyo vano, ntoko ekupalelo wira ninnaamini wira Munna Capps ti. . .

Akavi a nyuwo va mummusuwela Munna Capps? Nvenxe ntata. Vaareera, mukuruxe ntata. Akavi anaamini wira owo murumeyi a Muluku? Nvenxe matata. Hiyo ninnimphenta owo, ntoko munn’ihu.

²⁴ Vano ela vekeekhai kehiyo enamuna yoolikana ya etthu naarowaahu wiitthana okhalihwa murumeyi, masi kintthuna wira muthukuman’ola, nkaakhanle wiipaka nsipo nla, masi kintthuna wira mukikhaliherye ophavela.

²⁵ Nihiku nimosa profeta aaronwaawe waltaari, mpaani m’olompa. Nto oryeene weiwe mpaani m’olompa. . .Owo aari

mutthu ooreera murima, masi owo aarookhala paahi oophiteerya mmoononi mwa Oziya mwene, ni owo aari mu—owo aari mutthu ooreera murima. Masi nnakhala vo, nihiku nimosa, mpaani m'olompa, owo aahoonna etthu, vaakenlyawe mwa yoowoona, ahaatonko-awe wooka khalayi. Owo aahoonna Malaikha, ni mapupha, evavelaka nno ni nno, mpaani, ekhuwelaka, "Oowaarya, oowaarya, oowaarya, Apwiya Muluku Oowerya sothene!" (Rwaakani, munna. Ayo. Munnona?) "Oowaarya, oowaarya, oowaarya, Apwiya Muluku Oowerya sothene!" (Ben.)

²⁶ Nto voonalyaawe, mapotto a mpaani m'olompa yaahithukumela. Nto owo khwira, "Kootakhaliwa miyo! Okhala wira ka mutthu a iyano soonanara." Ohoolo wa Muluku owo aahisuwela, wira hata akhalaka profeta, owo aahivonya. Owo khwira, "Miyo ka mutthu a iyano soonanara, ni kinkhala eriyari y'atthu a iyano soonanara."

²⁷ Nto nimosa wa Malaikha khuvava, khukuxa nikhala na Mooro khukwanyya iyano sawe, khwira, "Mulaleerye, mwaana a mutthu!"

Mwaamunoopela nenlo, munna, xontte. Akavi ansuwela nsipo nla? Nrowe, eversu emosa. Vaareera.

Okathi makhala a Mooro amukwanyyale-aya
profeta,
Khimukhaliha ooloka ntoko sintthuneyaaya,
Okathi Nsu na Muluku niiraly'aya, "T'ani
onrowa?"

Vano owo aahaakhula, "Miyo kiri va,
mukirume."

[Nipuro vahiitthu mufiitani—Mol.]...
mulavule, Pwiya'aka,
Mulavule, nto miyo kinimwaakhula;
Mulavule, Pwiya aka, mulavule, Pwiya'aka,
Mulavule, nto miyo kinimwaakhula, "Pwiya,
mukirume."

Atthu imilyawu sene vano mutampini ni
ehaaya animookhwa,
Mwiwe wunla waya wooriiwiwa murima ni
woowaawa;
Mwaakuve, munna, mwaakuve mwaakuxe;
Mwaakuve mwaakhule, "Mwiixuttihi, miyo
kiri va."

Mulavule, Pwiya aka, mulavule, Pwiya aka,
Mulavule, nto miyo kinoowaakhulani
naanaanoru;
Mulavule, Pwiya aka, mulavule, Pwiya aka,
Mulavule, nto miyo kinimwaakhula, "Pwiya,
mukirume."

Ahumu yaattamele vano emwiixaatherye matata Munna Capps. Nrowe othene nuuramihe muru.

²⁸ Muluku oophentiwa, mapotto a mpaani mookokhorela aathukumela-tho, ni noonaka Erooho ya Ekumi envaha ekumi evaraka muteko mwa munn'ihu. Miyo kinvekela, Muluku, wira oonaka ela okhuma Osulu, enihimya wira owo ohaana orowa. Hiyo ninimwiixaatherya matata, ntoko ahumu Anyu, Pwiya, ni onvaha ntata noolopwana n'opatthana; ni omwiixaatherya matata ahu, ni onvekelela iparakha sa Muluku, wira Nyuwo muttikithele iyano sawe, wuupuwela wawe, mukhalelo awe wothene. Ni wira owo akuxe Mutthak'ola wa Ehapari yooreera wa khula munyatta ni nlootho Nyuwo munrowaanyu omwiitthanela-wo. Munivahe, Pwiya. Hiyo ninnoovahani Nyuwo munn'ihu, ntoko murumeyi Anyu, mwa Nsina na Yesu Kristu. Amen.

²⁹ "Mulaleye Masu," munn'aka mmiravo. "Mukhale mwa okathi, ni woohikhala okathi aya; nvaanyiheke, mpwapweleke, ni ovilela wothene ni Mwiiixuttiho." Muluku ooreeriheni, munna.

³⁰ [Munna Ben Bryant oniira, "Munna Branham, mwaamutthuna okiixaatherya matata? Awo yaamutthuna okiixaatherya matata? Kaatthuna kikkhalihawe."—Mol.] Mookhalana...? Nkaasuwela wira khimwaakkhalihawe.

Munna Ben, va, oonirweela. Kinoona wira owo onnilaleyaka mwa okathi. Nlelo, owo khonakkhalihawe murumeyi voothuneya (kooni wira aahikhala; mwaha wa yeeyo kimwiitthanne aka.) aahikkhalihawa, wala wiixaatheriwa matata vaava.

³¹ Vano, mwaara a Munna Ben ori vaava nipuro nlo, ni owo mutthu oophenteya. Owo aari mulaleyi muthiyana. Nto okathi owo ni munn'ihu athelananse-aya, nto owo khimuruuha otapernakulu, voonalyaawe ni vaiwalyaawe Masu, onaamwi okhanle mwamuthiyana ooreera murima ni omutthu wooreera, masi voonalyaawe wira yaari yoovonyeya athiyana wira yeeyo, owo oroohiya; ni eri ntoko yaamorenle aiy'awe. Eyo ekeekhaii. Eyo ti y'arummwa. Ti siiso erinaaya okhala.

³² Munna Ben onkuxa ifiita, ntoko sinsuwelaaka, ni amwaar'awe. Awo anoorowasa ma...mapuro oottaiwene, muhina mmiyaakoni, mutakhwani, ni anoorumihia ifiita iya ni olakiherya sa ifiita. Imaara sinci-ene awo annoomolasiwa, okhoottiwa, wiikarasiwa. Hiyo ninniwehererya yeeyo. "Maana othene ale ankhala vooreera murima mwa Kristu Yesu anoophwanya olupatthiwa."

³³ Akavi va ammusuwela Munna Ben? Akavi anaamini wira owo murumeyi a Muluku, oophwanela eparakha ela ninrowaahu onvekela Muluku mwaha wa yoowo? Moone, owo kahiyo muletto. Owo onnikhalaka ni hiyo mwa miyaakha ni miyaakha. Miyo kimmusuwela ntoko mutthu a wiisuumaaliha. Owo ori ntoko miyo; owo onnivonya vanci-ene. Hiyo othene ninnira yeeyo.

Etthu enikisivela ya Munna Ben, owo onnitthuna waapaseya ni makutha wira alokiherye.

Nto owo vaiwaly'awe, nihiku nlo, mwaha wa *Othelana Ni Omwalana*, owo ni amwaar'awe yaahilikana wira emwalane, okhala wira owo onnaaphenta, ni awo annimpenta, masi awo antthuna ekhalase voolikana ni Masu a Muluku. Etthu p'itthu Masu ahimaly'aya, ti yeeyo awo yaatthunasaaya. Kinvekela wira Muluku amureerihe Ben ni mwaar'awe, wa muteko Awe.

Nrowe nimwiixaatherye matata munn'ihu.

³⁴ Muluku Oophentiwa, hiyo ninnimwiixaatherya matata Munn'ihu Ben, ntoko ethoonyeryo wira ninnimpenta. Ni hiyo ninnaamini, Pwiya, wira owo onnitthuna woovarelandi muteko Nyuwo, wira orummwe ni ifiita iya, wira orumiheke eriyari y'atthu mmiyaakoni mapuro oottaiwene saana weiwo khino anci-ene a hiyo nihinkhalakhalahu niphiyaka-wo, masi nakhala vo Mutthaka ohaana orowa mulaponi mothene. Hiyo ninvekela wira Nyuwo mmureerihe munn'ihu, ni munvahe Erooho Anyu, ni wira Eyo emurweele. Ni mmuhoolele, ni mmweettiherye owo ni amwaar'awe mapuro weiwo khino munepa ole mmosa oryaaya-wo ottaiwene wu, ni mikhora khasikhanle owaleyaka mpakha epwittipwitthi ele okelihiwa. Nyuwo khamusiveliwe ni miloko mithanu na mixexe ni thanu na xexe. E... Khula nsina nri Multiivuruni nihaana oruuihiwa. Mwaakhaliherye, Pwiya, niwiixaatheryaka matata, ntoko oxirikha ni hiyo ntoko munn'ihu. Ni mukhaliheryo ahu ni onvekelela wahu, sinoorowa ni yoowo. Nto hiyo ninvekela wira Nyuwo mmureerihe, Pwiya, khula nipuro owo onrowaawe. Mwa Nsina na Yesu. Amen.

Muluku ooreeriheni, Munna Ben! Ntata noolopwana n'opatthana hiyo ninnoovahani, ntoko axinna arumeyi. Muluku ooreeriheni, munna.

³⁵ [Munna Earl Martin oniira, "Munna Branham, mwaamutthuna okipweherya matata, okikhaliha wira kivare muteko ntoko pastore?"—Mol.] John Martin... ["Earl."] Earl.

Akavi ammusuwela Earl Martin? Akavi anaamini wira owo murumeyi a Kristu? Owo onrwa wa hiyo okhuma mu... kookupali, voopacerya wa nikhuru na oPentekosite, nto vano miyo kinoona wira owo onrumeela ni onvara muteko wootaphuwa.

³⁶ Miyo kinimusuwela Earl ntoko murumeyi eekeekhai a Kristu. Nkinkhalakhala kiliyalaka muteko mmosa, sookhala sinci-ene, masi muteko mmosa ni Earl. Kinnuupuwela ohiyu umosa awo yaamwiitthanne-aya kiryeene oDallas, Texas; ahiiso miyo—kookupali, nnari, waari... [Munna mmosa muthiyana oniira, "oBeaumont."—Mol.] oBeaumont, Texas, ti siiso, munna. Ni awo—awo... Mwan'awe aarimwaataleleya, akhwaaka, ni yuupuweliwa wira aahikhwa. Owo khaamumula-tho. Nto Earl

aahirwa khuphiya oskritooryu waka, ntoko tiithi, ni makhata oomora, khuurama ohoolo waka, okhala wira kaari voolilini. Kivenya; owo khukipatikha khwira, “Munna, kinnaamini wira nyuwo mwa profeta a Muluku. Miyo kweekwe kinnaamini yeeyo. Nto nyuwo mwahimya-ru nuulumo paahi, hata mwan’aka akhwaaka, onookhala mukumi.” Nto mwan’awe khutthikela ekumi, mukumii.

³⁷ Munnaamini wira owo onniphwanela moonoo woolopwana wa opatthana w’alipa-oowaamini ala? [Muthukumano oniira, “Amen.”—Mol.]

Nivekele, axinna, nimwiixaatheryaka matata.

³⁸ Tithi a Wirimu ooreera murima, hiyo ninnimwiixaatherya matata, emaara ekina, Munn’ihu Martin. Hiyo nimmuveleeliherya, Pwiya, mapuro oottaiwenexa Nyuwo mutthokin’he-anyu wira owo aahaana orowa; onakhaleru vayi, anci-ene wala vakhani, miphito, iphiro, mikuso, ni sikina. Onakhale-ru vayi, Pwiya, iparakha Sanyu sikhale ni yoowo. Hiyo nimmwiixaatherya matata nimutthunelaka omukhapelela Wanyu ni onvaha iparakha sahu, wira Erooho eri mwa hiyo, Pwiya, erowe ni yoowo, ni wira emuhoolele ni emweettiherye minepa sirimeenle mmikusoni wu ni iphiro. Hiyo nininveleeliha, mwa Nsina na Yesu Kristu. Amen.

Muluku ooreeriheni, Munna Martin. Muroweke vano, ni Apwiya akhale ni nyuwo.

³⁹ Mwaha wa niwoko nimosaru? [Munna Richard Blair onlavula ni Munna Branham—Mol.] Richard ti nsina nanyu? [“Ti siiso. Richard Blair.”] Akavi ammusuwela Richard Blair? Akavi anaamini wira owo murumeyi a Muluku? Owo onikhuma ni—nikhuru na ekereja ya Pentekosite Oowiiwanana.

Nto munna, Munna Blair, kinnuupuwela wiitthaniwa wuulupale, wawawe. Kinnuupuwela okathi Munna Blair ahaatthunaawe, khaatthuna okaamini miyo, okhala wira yaahikhala erooho yaavara muteko ni yoowo, emuleelaka wira kaari oowootha. Nto okilaanthe-ene vamuthukumanoni, Erooho Yoowaarya khurukunuwa khuhimya. Ni owo aahalela o—omora ohileya, ni ti yeeyo emukhalinhe mukhalelo owo.

Ni kinnimuupuwela mwaar’awe oophenteya okiitthanaka nihiku nimosa. Owo khwira, “Munna Branham, kookupali wira Richard onrowa okhwa.” Nto owo aahikhalana, kookupali, nleeso nimosa. Owo khurowa khumpweherya, okathi ovekenly’aka, khuvekela. Ola ori va.

⁴⁰ Mwanamwane mmosa mwaamukhaani aaphiphwanya ehasara, wala, [Munna Blair oniira, “Mmiravo aka.”—Mol.] mwan’awe, ehasara, awo yahaarinaaya ororomelaxa wa yeeyo, ni opwexeya wa ottooporo. Nto ni mavekelo, hata ni telefooni, mwaana khuvonihiwa.

Munnaamini wira Munna Blair namoona eekeekhai a Kristu? [Muthukumano oniira, “Amen.”—Mol.] Nvekele wira iparakha sanyu sirowe ni yoowo.

Axinna, mmwiixaatherye matata.

⁴¹ Muluku Ootthuneya, wira mmusuwanyeihe munn’ihu ooreera murima ni ootittimiheya, murumeyi Anyu, yoowo hata okhumme munikhuruni mwawe, wira eetteke Mowaaryani. Tithi, hiyo ninvekela wira Nyuwo mmureerihe Munn’ihu Blair, okathi oninveleelihaahu ni iparakha sahu ni olipiherya wahu, ni matata ahu mwa yoowo, wira khula nipuro Nyuwo mukhanlyanyu omwiitthanaka, Pwiya, wa khula muteko okhanle. Erooho Anyu erowe ni Munna Blair. Mmuhoolele ni mmweettiherye w’ale oorimeela ni ankhwa a olumwenku ola, wira okhaliherye ophwanya epwittipwitthi iyo erimeenle, wira owo ahokoloxerye munikotoni. Enakhaleru etthu p’itthu, etthu p’itthu Nyuwo murinaanyu wira mmunnye, Pwiya, hiyo ninvekela paahi wira Erooho Anyu emuhoolele ni emweettiherye moovirani mothene mwa ekumi awe. Hiyo n’axinn’awe. Ninvahaka moonoo woolopwana wa opatthana, hiyo ninoovekelani wira Nyuwo murowe ni yoowo, mwa Nsina na Yesu Kristu. Amen.

Ntata noolopwana n’opatthana! Muluku ooreeriheni, Munna Blair. Hiyo nri ni nyuwo, ipursentu emiya, noovekelelakani ni nnimwiira etthu p’itthu enweryaahu wira nookhaliheryeni. Muluku ooreeriheni.

⁴² [Munna Merlin Anthon oniira, “Etthu emosaru ni miyo, Munna Branham, wira kikhalihiwe.”—Mol.] Munihimya exeeni? [“Okhalihwi.”] Nyuwo mw’ani? [“Merlin Anthon.”] Merlin Anthon. [“Kiri mukereja.”] Vayi? [“Va mukereja.”] Mukereja. Ookhala ommusuwela Munna Merlin Anthon? Owo t’a naanaano, wa miyo. [“Ni Anakhotto a Woopola. Munnikuupuwela?”] Oh, ayo. Mukilevelele, munna.

T’a Anakhotto a Woopola, ti yeeyo, kinnimuupuwela. Tthiri, kinnimusuwela vano. Miyo paahi. . . Nkuupuwela ethoni awe okathi ene yoole, okathi ula. Akavi anuwela wira owo mutthu a Muluku? [Muthukumano oniira, “Amen.”—Mol.] Akavi anaamini wira—wira Muluku onvara muteko ni yoowo? Nvenxe ntata. [“Amen.”] Munoonvekelela? [“Amen.”]

⁴³ Vano, munna, hiyo noosuwela wira nyuwo munkhuma nikhuru nuulupale n’atthu, Anakhotto a Woopola, awo atthu aalupale. Masi, nto, masi Anakhotto a Woopola annivara muteko muulupale mphironi. Khanikhanle waahimyanaka etthu ya nthowa aNasareeno, ekereja ya Pentekosite, wala Anakhotto a Woopola, wala khula mmosa a yaawo; awo axinn’ihu. Masi, moone, hiyo ninnaamini wira hiyo n’a anamakuxa Mutthaka muulupale wa okathi ula oonkhalaahu. Munnitthuna wira yeeyo ni hiyo? [Munna Anthon oniira, “Amen.”—Mol.]

Nrowe nuuramihe muru nimwiixaatheryaka matata munn'ihu.

⁴⁴ Tithi a Wirimu oophentiwa, Nyuwo mwa Ole muniitthana. Nyuwo mwa Ole onvaha ekumi Masu, wira awo awerye waamini. Nto hiyo ninimwiixaatherya matata munn'ihu oophenteya, ntoko olipiherya wira ninnaamini wira Nyuwo muri ni yoowo ni munoomukhaliherya. Hiyo ninveleeliha iparakha sahu ni yoowo, wira hiyo ninnaamini wira noovira mookhwaani khuphwanya Ekumi nto vano nihaana Owerya woovaha ekumi mmurimani mwahu, mwaha wa mahala a Muluku, hiyo ninimwiixaatherya matata munn'ihu ni nveleeliha ni iparakha sahu, wira Nyuwo mmuhoolele ni mmweettiherye ni munveleele khula nlootho na mulaponi, Pwiya, Nyuwo mutthokihenyanyu wira owo arowe. Erooho Anyu erowe ni yoowo ni envahe ekumi, ikuru, ni okelela ohoolo mmutekoni mwawe, maana hiyo nimmuveleeliha mwa Nsina na Yesu Kristu. Amen.

⁴⁵ Muluku ooreeriheni, munna. Nlo ntata noolopwana n'opatthana, moosuwela, axinna nvahane matata ni yoowo, axinna siiso. Tivo ti nyuwo mwa...Vaareera, Apwiya yooreeriheni nyuwo othene.

⁴⁶ [Munna Carrell oniira, "Miyo—miyo nkinakhalihewe, voothuneya. Kintthuna mukiixaatherye matata, ntoko ale, mwa Nsina na Yesu."—Mol.] Nyuwo, khula etthu entthunaanyu. Ni yawinyu. . . ["Okathi wo wiiriwa, ni voolikana n'ale."] Vano nsina nanyu ti pani? ["Munna Carrell, a oCincinnati."] Munna Carrell.

[Munna Carrell oniira, "Miyo kaari mulaleyi ootkhalihwiwa, masi nkaawerya wiiraana ni munna aakhalihya athiyana ntoko arumeyi, ni kaahaana wiivalaaniha ni yaawo."—Mol.]

Ola ti Munna Carrell a oCincinnati. Ookhala onimusuwela Munna Carrell, nvenxe...Okhalaka a oCincinnati, miyo kinnihoverya, wira ookhala ommusuwela. Owo onihimya wira aari nnikhuru nimos, nto nikhuru naatthuna waakhalihya athiyana arumeyi. Owo khaawerya ovilela, ni aahaana wiivalaaniha n'awo.

Ti siiso miyo kivalaanne aka ni Mamisiyonaariyu aPatista. Totori Roy E. Davis, akavi atonko wiiwa sa yoowo? Vekeekhai, muhiiwa, moone. Owo aatthuna waakhalihya athiyana alaleyi, nto miyo khwira, "Nnari, mulopwana. Ntoko humu," miyo khwira, "Nkikhanle wiiraka siiso, kisuwelaka saana. Ti yoovirikanya Masu a Muluku."

⁴⁷ Miyo nkinoosuwelani, Munna Carrell. Masi voothariha onamoona anyu, ni Ekeekhai iyo nyuwo muneemereryaanyu. . . Hiyo kharina hat'etthu ya nthowa n'athiyana awo. Awo axinna. Hiyo ninnaaphenta. Masi ninnaamini wira awo aakhalana opuro aya, ni wira ahaana okhala. Munnona? Ni ninnaamini wira awo t'osivela wa mulopwana, namakhaliherya.

Ni mwa hata enamuna...Hiyo ninuupuwela wira awo ti yoovaha yuulupalex, woohikhala woopowa, Muluku otonko awe onvaha mulopwana. Masi owo khorina nipuro vapulpitu, voolikana ni Masu a Muluku. Vasulu va mulipiheryo yoowo, ni omwaamini wanyu Muluku, hiyo niniwiixaatheryani matata, ntoko opatthana, wira mweetteke ni hiyo.

Nrowe nimwiixaatherye matata.

⁴⁸ Tith'ihu a Wirimu oophentiwa! Mmiravo ola, miyo kinnihalela osuwela moota sinoonaawe. Owo ohoomoliwa mwaha w'Ekeekhai yoolikana. Wira, "Mutthu khankhala mukumi ni yoolya paahi, masi ni Masu othene." Tivo hiyo ninnimwiixaatherya matata, nihelaka iparakhaha sahu mwa yoowo. Erooho Anyu emweetiherye, emuhoolele, ni envelele moovirani mothene wa ekumi khula nipuro Nyuwo munthunaanyu omuruma-wo, Pwiya. Mmuhiye asuwele wira hiyo ninoonvekelele, ni onrowa okhala mukhaliheryo wa yoowo, ni ninoomukhaliherya okathi wothene owo onrowaawe weemererya Ekeekhai. Munivahe, Pwiya. Hiyo nimmuveleeliha, mwa Nsina na Yesu Kristu. Amen.

Muluku ooreeriheni, Munna Carrell.

Nyuwo moowiixaatherya matata, oohiyana-hiyana. Nyuwo othene munvahe ntata noolopwana n'opatthana mwaha wa yeeyo.

⁴⁹ Munna Ruddell, va, owo khonakhaliheweke murumeyi vootthuneya vaava okereja. Munniwerya... Akavi ammusuwela Munna Ruddell? [Muthukumano oniira, "Amen."—Mol.] Hiyo othene ninnimusuwela. Akavi ansuwela wira owo mutthu a Muluku? ["Amen."]

Tithi a Wirimu oophentiwa, nikhalaka ahumu Anyu ninnimwiixaatherya matata munn'ihu ola orwiiye ovira mmaasini moowiixerya, a marove. Ohoona muthukumano awe omora. Owo ohoona sothene siiraneyaka, masi nlelo onnaamini. Hata e...?...Hiyo ninimwiixaatherya matata, ni ninnihela iparakhaha sahu wa yoowo. Mmuttikithele, Pwiya, voowerya-vo, ni Masu, Pwiya, ni munveleeliherye khula nlootho na elapo ya vathi!...?...mukhale mwa yoowo ni mmukhaliherye. Nto munveleelihe, mwa Nsina na Yesu Kristu. Amen.

⁵⁰ Munna Ruddell, okathi wothene munookhalana ntata noolopwana n'opatthana. Miyo kinnimusuwela Munna Ruddell. Onkhala ntoko—ntoko mwan'aka yoomi. Atithi awe ni miyo, ame awe, ninnisuwelana okhuma khalayi. Ni miyo kimmusuwela Munna Ruddell ntoko murumeyi a Muluku. Miyo koorumeela ni yoowo. Muluku ooreeriheni, Munna Ruddell.

⁵¹ Nsina nawe ti pani? Nyuwo mw'ani, munna? [Ookhala oniira, "Mulamu awe Munna Martin."—Mol.] Munna Martin, nyuwo munnimusuwela, Munna Martin?

Nsina nanyu ti pani? [Munna oniira, “Reverendu McComas.”—Mol.] Munna McComas. Kinoona wira khaavo va ommusuwela, masi owo ti...Ayo, mulopwan’ola va onnimusuwela, Munna Tyler. Nto owo onoorwa wira... iixaatheriwe matata, wira akhale namakuxa Ehapari yooreera. Munna McComas, nyuwo mw’a a vayi, Munna McComas? [“Rockford, Illinois.”] Rockford, Illinois. [“Nyuwo mwaahilikarela owannyaka, esumana evinre, ahiiso Sekunta evinre ohiyu, khwaavekelela amwaar’aka.”] Oh, ekeekhahi iyo? Okhuma oTucson. [“Tucson, Arizona.”] Oh, kinnimuupuwela oraami uwo vano. [“Awo yaahivenya voosiisu aya.”] Attottopeliwe Apwiya!

[Munna Martin onimuhimeerya etthu Munna Branham—Mol.] Munihimya exeeni? [“Murokor’aka mwaamukhaani.”] Murokor’inyu. [“Owo ori vaava naanaano. Aaroorakala.”] Tivo, owo ori vaava vano, aahivekeleliwa, ohiyu uwo, okhuma oTucson, ni telefooni. [“Oorakala.”] Pa... [“Owo aaroorakala, nto ori vaava naanaano va.”] Owo aaroorakala, ohiyu vakhani ovinre, nto owo ori vaava naanaano va. Munna Martin onnisuwela, mpatthani. Khivanxankiha owo otthunaka okuxa Mutthaka!

Nrowe nimwiixaatherye matata munn’ihu.

⁵² Muluku Oophentiwa, kinimwiixaatherye matata, n’akina, murumeyi Anyu, ni onvaha ntata noolopwana n’opatthana, nivekelaka wira iparakha sa Muluku si...?...ntoko Nyuwo simutthokihenryaanyu. Eparakha Anyu ekhale mwa yoowo, ni mmuhoolele ni mmweetiherye, mwa Nsina na Yesu Kristu. Amen.

Ntata noolopwana n’opatthana, munn’aka, nto ale akhale ni nyuwo. Muluku akhale ni nyuwo.

⁵³ [Ookhala oniira, “Munna Branham?”—Mol.] Ayo, munna? [“Kihaana mmosa-tho onttuna yeela nave.”] Vaareera, mulopwana. Kookupali wira ola ti... [“Munna Darris.”] Munna Darris. Miyo nki... [“Miyo kinnimusuwela Munna Earl ni Munna Brewer.”] Mulopwan’olla ti Munna Darris. Nyuwo mw’a a woowi, munna? [“Black Rock, Arkansas.”] Black Rock, Arkansas. Munna... [“Miyo kinnimusuwela, munna.”]... kinnimusuwela. Mutthu mukina tho, kookupali, va, ehimnye... Munna Brewer. Kookupali wira kaasuwenle, voosiisu yoola. Ni—ni Munna Vayle muthiyana, woona waka, Munna Vayle, ni ale ammusuwela, ni animusuwela owo okhala mutthu a Muluku, murumeyi a Muluku. Vooreera!

⁵⁴ Ahe, vano, munn’aka oophentiwa, mwaha wo okhala namakuxa Mutthaka, ninthuna wira musuwele wira hiyo ninimookhaliheryani, wira sothene sinweryaahu. Hiyo ninrowa okhala noovekelelakani, wira nave-tho nyuwo

mukuxe Mutthak'ola mpakha mapuro oottaiwene Muluku ootthokihenryaaweni wira murowe.

Nrowe nimwiixaatherye matata Munn'ihu Darris.

Muluku Oophentiwa, hiyo ninnimwiixaatherya matata munn'ihu, ninvahaka ntata noolopwana n'opatthana, ni omuruma mwa Nsina na Yesu Kristu, wira Nyuwo mmuttikithele. Ni...?....onvaha ntata noolopwana n'opatthana!...?....Nto Erooho Anyu erowe ni yoowo, ni emuhoolele ni emweettiherye, mwa Nsina na Yesu Kristu. Amen.

Muluku ooreeriheni, munna.

⁵⁵ Vano, kinnimwaamini, Munna Anthony. Anci-ene a nyuwo munnimusuwela Munna Anthony. Owo onkhala vaava ni hiyo okhuma khalayi. Miyo kinnimusuwela owo okhala murumeyi a Kristu, yoomi. Kookupali wira owo mmiravo owiivahererya. Owo khaaixaatheriwe matata vootthuneya. Owo khaasuwele wira ela yaamoora, apatthani. Munnona? Masi naanaano va ti yooreera ntoko khula okathi. Tivo ninrowa omwiixaatherya matata Munna Anthony ni ninvahe ntata noolopwana n'opatthana. Muluku ohaana okhaliha. Ela eri wira owo asuwele paahi, ni wira nyuwo musuwele, wira hiyo ninnimwaamini munn'ola ni ninnimphenta, ni owo mmosa a hiyo, Mmutthakani. Ni hiyo nintthuna wira owo akhalane iparakha sa Muluku, nto ti yeeyo eninkelelaahu. Nivekele, niwmiixaatheryaka matata, munna.

⁵⁶ Muluku Oophentiwa, murumeyi ula oowiiyeviha, murumeyi Anyu mwItaliya, Pwiya, onoorwa ohiy'ula, wira a—wira aixaatheriwe matata, ni ntata noolopwana n'opatthana ookoleliwe vootthuneya, na mukereja. Pwiya, Owerya Wanyu wuulupale onveleelihe mmiravo ola mapuro a mulaponi ni munloothoni Nyuwo mmwiitthanenlyanyu-wo. Ni wira owo arowe aavuluxe athu ale mutampini ni eretta, ni oorumeeleni Nyuwo, Pwiya, mahiku othene a ekumi awe. Nyuwo mmuholele, mmweettiherye. Iparakha sahu sikhale ni yoola, ninveleelihaka, mwa Nsina na Yesu Kristu. Amen.

Muluku ooreeriheni.

⁵⁷ [Ookhala onlavula ni Munna Branham—Mol.] Huh? Oh, nkisuwene. Hiyo ni atelefooni oolikariwa; isentavo miloko mithanu khula minuutu. Aahikhala mutthu mukina va aathuna... .

Mwaattamele va muhimye masina anyu, nyuwo mw'ani, axinna, vamikrofooni *vaava*. Muhimye paahi. [Khula munna onihimya nsina nawe, "Pat Tyler," "Claude Boggess," "Dale Potter," "...?....Henasey," "James Humes," "Earl Horner."—Mol.] Ti yaawo? [Ookhala oniira, "Ayo."] Axinn'aka.

Axilopwana ala, munnaamini wira Mutthak'ola Ekeekhai ya Masu a Muluku? [Axinna aniira, "Amen."—Mol.] Munnaamini yeeyo ni murim'anyu wothene? ["Amen."] Vaareera. Ni munnitthuna, ni munnaamini wira nawiixaatheryani matata... Ninthuna musuwele wira hiyo nri ni nyuwo, ni ninimwiira ethhu p'itthu enweryahu wira nookhaliheryeni.

Nto vano kintthuna wira nyuwo axinna, wira kiwerye owiixaatherya matata nave, yaattamele va vano. Nto nrowe othene nuuramihe muru ahu, niwiixaatheryaka matata.

Muluku Oophentiwa, va nri nikhuru na axilopwana. Kinnimwiixaatherya matata khula mmosa a yaawo, mwa Nsina na Yesu Kristu, Mwaana a Muluku. Ni wira Nyuwo, muwiitthanne wira akhale arumeyi, wira alaleye, Pwiya, mahiku othene a ekumi aya, ni...?...wira alaleye Ehapari yooreera soopattuxiwa sothene. Hiyo ninnaavaha ntata noolopwana n'opatthana, ni ninvekela wira iparakha Sanyu sikhale ni yaawo, Pwiya, naareerihaka, niveleeliheryaka iparakha sahu. Arowe khula nlootho na mulaponi Nyuwo muwiitthanenlyanyu wira arowe. Awo evare muteko ni yoorumeeleni Nyuwo mwa owerya Nyuwo muwiitthanenlyanyu. Akhale arumeyi oominyala ni arumeyi eekeekhai a Muluku. Munivahe, Pwiya. Nto hiyo ninvekela mwa Nsina na Yesu Kristu.

⁵⁸ Muluku ooreeriheni, khula mmosa, axinna. Muluku ooreeriheni. Muluku ooreeriheni, munna. Muluku ooreeriheni. Muluku ooreeriheni, Munna Humes. Apwiya akhale ni nyuwo, khula mmosa.

Noottotopeliwa nikhale nlutte nintthuka
Mirima sahu moophentani w'oKristu;
Opatthana wa muupuwele mmosa
Ori ntoko ole Osulu.

⁵⁹ Owo kahi oothamaleya? Muupuwele paahi vano, arumeyi akavi ari va ohiy'ula wira yiixaatheriwe matata!

⁶⁰ Nkaasuwela wira naahikhalana olikariwa nno wa telefooni. Atthu iwo yakilevelela-ru mwaha wa yeeyo; miyo nkaasuwela. Munnona? Miyo nkaasuwela paahi wira waamurowa olikariwa Mutthak'ola mwaamukhaani ohiy'ula. Masi hiyo nri...

⁶¹ Vano ninrowa osoma Masu ni nivekele, nto ninookelela Mutthak'ola ononaaka wira Erooho Yoowaarya enikitumererya wooruuhelani ohiy'ula.

⁶² Nto vano nikhunlaka mwa...wa yoosoma, kinoohimya okathi vakhani. Nrowe nikhunle Mothakoni, kapiitulu 22, versiikulu 31. Mothakoni 22:31, ntoko yoosoma. Mukhunlaka, mwatthuna osoma, osoma wala olepa.

⁶³ Kintthuna wira nyuwo othene mukuupuwele vano, mpakha kitthikele-tho owoonani, kinroromela wira, onookhala okathi uwo elimwe ela, Apwiya yatthuna vale. Nto yakhumelela

etthu, miyo kuhurowa ilapo s'okhopela, kinootthika. Masi vano ninnaamini, moota sothene siniireyaaya, wira Erooho Yoowaarya enoorowa oniveleeliherya vano mwa enamuna Eyo enithanlenlyaya Eneene oniruma. Ni ti siiso hiyo onttthunaahu wira. Apwiya yooreeriheni!

⁶⁴ Tithi, hiyo nihanle osoma Masu Anyu. Ninroromela wira munoorerihya Yaawo ni muttikitthele maiwelo ahu, hiyo ninvekela mwa Nsina na Yesu Kristu. Amen.

⁶⁵ Eliivuru ya Mothakoni, kapiitulu 22 versiikulu 31.

Nto APWIYA yaahimutthukula maitho Palaamu, owo aahoona nlaikha na APWIYA neemenle-ene mphironi, nimukunxe xoowa mmatatani: nto owo aahikokhora, khwiipopheya vathi.

⁶⁶ Vano, nisomaka yeela, wira nipake yoohimya, kintthuna kikuxe mwaha: *Muluku Onnirukunxa Muupuwelo Awe Vanaasiwa Masu Awe?*

⁶⁷ Eyo ti yoosoma yoosuwanyeya, ni Ekeekhaii yuulupale naatthuneya hiyo osulelaka saana. Muluku pooti ohimya etthu vano nto khunaira, "Kileveleliwe mwaha w'ohimya"? Muluku ookhala oohokolaxaka Masu Awe, Owo ohimye-ene?

⁶⁸ Vano, mwa nuulumo nla va, etthu kithanlenly'aka mwaha ola, waari mwaha wo wira nlo nimosa wa moolumo a mBibiliani mulipa-oosoma, ophavelaka woona, ahiiso oneererya ohimya wira Muluku onnirukunxa muupuwelo Awe; ela yaarowa okhalaka ntoko wira Owo oorukunxa muupuwelo Awe ovikana khula nipuro mBibiliani, ntoko sinsuwelaaka, okhala wira Owo aahimuleela Palaamu etthu emosa vano nto khimuleela ekina. Nto vano, atthu anci-ene aheererya omukhalihya Palaamu paahi, oh, nahako wala etthu siiso. Masi Palaamu khaari nahako. Owo aari profeta a Apwiya.

⁶⁹ Vano, hiyo ninrowa opaka ekweretho ya Mutthaka, toko. Isarayeli aari mmukwahani mwawe okhuma oPales- . . . arowaka oPalestina, akhumaka wEjitu. Ni Apwiya yaari ni yaawo, vano awo yaari. . . Khula nwanani aavenya ohoolo wa Isarayeli aanikumihya mphironi, okhala wira Muluku aahimye wira Owo aanveleliha miwi ohoolo waya ni saammoomola nwanani, vaakhanle-ru wira awo yeetta yiiwelelaka yooruma Awe. Muteko khuwaari muulupalex. Amaleki, ookorosowa a nihiku nle, khiyaahimya etthu wa Isarayeli. Anaamwi awo yaari atthu ooyeva mwa mukhalelo, masi awo yeetta mwa SIISO ANIHIMYA T'APWIYA. Tivo khivaacala ole aari nwanani, Muluku okathi wothene aahilipiherya wira Masu Awe a natiri khanavonyeke wa Isarayeli.

⁷⁰ Nto Isarayeli a Waataana Wa Khalayi ti ethoonyeryo ya Mwaakameliwa a Waataana Wa Naanaano, okhumaka momolumwenkuni, eettaka ephiro orowa oKanani, ahiiso oKanani hiyo onrowaahu, Mileeniyu.

⁷¹ Vano, vano, hiyo ninninweha Mowabi va ti ethoonyeryo ya ekereja. Nto Mowabi...Awo yaahiwiiva mamwene amosa-amosa ni yaahimwiikara nwanani, yaahiiva sothene, khukuxa elapo, ni khurowa mpakha oMowabi. Vano, Mowabi khinaari nloko n'epakawu hata vakhani. Mowabi naari nloko naamurumeela Muluku mmosaru Isarayeli aamurumeelaawe. Nto elapo ya Mowabi voopacerya yaaphattunwe ni mwaana a Lothi, aakhalanne-awe ni mwan'awe muthiyana. Nto owo, ory'ene mulipa-oopaceriha elapo ela, ni aahaathokiha athhu a ntittimiho ni sikina, khupaka elapo yuulupale mwa yeeyo, ni awo yaahaacerereya khwaatta.

⁷² Nto, vano, Isarayeli aari a osuulu w'Abrahamu, kahi wa Lothi. Isarayeli aakhumme mwa Isakhi, Yakope. Nto Isarayeli aakhumme mwa mahimo ale muloko ni maili a Yakope, yoowo ohoolo waya aaitthaniwe "Isarayeli," okhala wira owo aahiwana n'Apwiya. Nto Mowabi va . . .

⁷³ Vano, mwa yeela, ni nyuwo athhu mu—mutelefoonini, Kintthuna toko kihimye wira miyo—miyo nkinthuna okhala namuulumela, ni kinroromela wira nkihiyo. Masi, Mutthaka kivahiwaaka, kihaana okhala oororomeleya ni Mutthaka yoowo, ahiiso kinookhala namirima miili. Munnona? Miyo—miyo nkikhanle ohimyaka ovikana ele kiveleeliheriwaaka wira kihimye.

Ni miyo—miyo kinnuupuwela wira nwanani muulupale a muxovo w'oKristu olelo ti ikereja sootthokihiwa. Miyo kinnaamini ni murima aka wothene wira vookiserya enrowa opakeya ekanyeryo ya nxeni, yeeyo kinuupuwelaaka, wira kinoowerya wooniherya ni Bibilia ni mukhaliheryo wa Muluku. Miyo kiihira eyo. Wira, eyo enrowa opaka ekanyeryo ya nxeni, mmwaataanoni wa ikereja. Okhala wira, Muluku khonatoko, hata okathi mmosa, khonakupaliki ekereja yootthokihiwa, ekereja yootthokihiwa, nnakhala. Owo khonaireke.

Ni khula okathi mutthu opanke-awe mutthenkeso, Erooho ya Muluku yaahihiya ni khenatthikeke-tho. Mmukohe khula nammulepa wahala, wala nyuwo mwa mulipa-oosoma yeenyu. Nnakhala! Awo vaitthokihalyaaya, Muluku opwenhe mwaarumari, nto ti vaavo owo oronwaaya; okhanle vaavo, okhuma okathi yoowo mpakha ohoolo. Awo ahinnuwa mwa waacerereya mamempuru, masi khonakhaleke ovenxiwa wa Erooho; nnakhala, nnakhala-tho.

⁷⁴ Mowabi, va, ti ethoonyeryo ya yeeyo, okhala wira awo yaari n—nloko nootthokihiwa; mmuttettheni mwaya, ntoko mmuromoleloni mwaya. Nto vo yaahikhalana itiini saya, ni etiini aya yaari etiini emosaru Isarayeli aarinaawe. Awo yaari aMowabi ni yaanimwaamini Yehova Muluku, masi awo yaari nikhuru nootthokihiwa n'athhu.

⁷⁵ Ni, vano, okhala wira awo anthoonyerya ekereja y'erutthu, Isarayeli onthoonyerya ekereja ya erooho mmukwahani mwaya. Vano, Isarayeli khaari nloko nootthokihiwa. Okathi wothene awo yaamuttharaaya Muluku, awo yaari ootaphuwa. Awo yaahiphiya, anawetta, hata nipuro n'orowa. Khula nipuro Nripu na Mooro naarowaaya, awo yaarowa ni Nenlo. Awo khayaari nloko nootthokihiwa. Awo yaarina ekhalelo eriyari aya, okhala wira olyihiwa masoma waahaavaha yeeyo vathi va yooruma ya Muluku, masi khayaari nloko nootthokihiwa okathi owo. Vookiserya vakhanlyaya nloko nootthokihiwa, ti vaavo awo yaamonryaya khimukhootta Mesiya aya.

⁷⁶ Nto vano hiyo ninniphwanya wira, kweekwe, wira okathi sinkumanaaya, iya s'erutthu ni sa erooho, irooho sa ikereja ni mitthenkeso, kweekwe enkhala ekumulanelo. Khenavonyeke okhala siiso. Kweekwe sinookumulana. Okhala wira, ninniphwanya wira mmwe ninkhala nrima. Nto vaavo, mwa nrima nenla, ninruuha wiilikanyiha wa mw'erutthuni, itakiheryo. Nto hiyo ninniphwanya olelo, ntoko saary'aya okathi ule. Muluku amwiirela-ru etthu mutthu, atthu othene aneererya otakiha siiso ntoko Muluku simwiireny'awe mutthu uwo. Moone, eyo eniruuha oxiraana, ni enikumiherya itthu sa mw'erutthuni. Vano nto epantte ekina, awo yaahiweyeke, okhalana iphwanyeryo sa erooho, vano awo ankuxa ni ikuru sa poliitika, wala anrantteliha etthu, wira ethananihe muupuwelo w'atthu, wira yiiruuhele awiixutti.

⁷⁷ Vekeekhai ti yeeyo yaakhumelenle woopaceryani wene; ntoko Kayini ni Apele, amiravo oowaili mulaponi mu. Nto okathi Apeli onvahalyawe Muluku mukuttho wootepaxa oreera onvikana Kayini, ni Muluku khimulipiherya Apeli, mwaha wo okhuruwa khwaakhela mukuttho awe, waahiruuhela nrima ni Kayini, okhala wira aahikhala nanrima mwaha wa munn'awe, nto khumwiiva munn'awe.

⁷⁸ Eyo epacenrye wopaceryani, wira okathi y'erutthu ni ya erooho. . . Nnya Kayini ni Apele yaamukokhorela Muluku mmosa, awo oowaili yaatenke altaari oolikana, ni oowaili aya yaamukokhorelenle Muluku mmosa, ekereja emosaru, altaari mmosaru. Masi Kayini, mwaha wo otthokelela wa mw'erutthuni, aaruuhale mihokorokho sa mutthayani khuhela waltaari ntoko mukuttho, uupuwelaka wira tthiri ela yaammusiveliha Muluku ntoko ettipiheryo. Tivo siiso owo iira oruu hale, ntoko atthu sinuupuwelaya olelo, "masa Atamu ni Hawa yaakunxe-aya, wira yaahiruuhale etampi." Nto, etthu p'itthu, miyo kinoona wira awo vano arina "roma" wala etthu vano. Akina wa awo yiirale, woohikhala khalayi, wira yaari etthu ekina.

⁷⁹ Ni, masi Apeli aarina mukuttho woolikana. Owo aanisuwela wira yaari ephome yiirale, tivo owo aamuruuhale-awe mwaapwittipwitthi. Nto okathi Muluku aakhenly'awe wawawe, vano, Apeli, mwaha wo waamini, ni muupululo, khiyaavo

enamuna ekina. Khaakhanle Bibilia aalempwe. Tivo, moone, epacerelo ya exariya ti Ekeekhai ya Muluku yowuupululiwa, ni Ekereja yothene ya Muluku mukumi etekiwe vasulu va yeeyo.

⁸⁰ Yesu, nihiku nimosa, akhuruwaka vamwaako, aahaahimeerya awiixutti Awe, “Atthu aniira wira Miyo Mwaana a mutthu ki pani?”

“Mmosa khwira Nyuwo mwa Moise, nto mukina khwira Nyuwo mwa Eliya, ni Nyuwo mwa Yerejiya, wala mmosa a maprofeta.”

Owo khwira, “Masi nyuwo muniira wira Miyo ki pani?”

⁸¹ Owo p’ukathi murummwa Petru, oowuupuxeriwa ni Muluku, oovahiwa ekumi ni Erooho, aahimmyawe nuulumo nlo noosuwanyeya, “Nyuwo mwa Kristu, Mwaana a Muluku mukumi.”

⁸² Nkawehani nuulumo nlo. “Ooreeriwa ti nyuwo, Simoni, mwaana a Yona, erutthu n’iphome khewuupulululeni ila. Atithi aka a Wirimu t’awuupulululeni yeela. Nyuwo mwa Simoni. Vamwala va . . .”

Mwala xeeni? Vano, aKatolika anihimya wira, “Vasulu va Petru, mwala, nluku nikhaani.” Vano aPrustante aniira, “Mwa Kristu, Mwala.”

Kahi wira kikhale oovirikana; masi waari vasulu va muupululo Petru aarinaawe, ohimyaka Ole Owo aary’awe. “Khaavo onwerya orwa wa Miyo,” ohimye ti Yesu, “vahikhanle wira Atithi Aka anoomuruuha. Ni ale othene Atithi akivahaly’aya animoorwa wa Miyo.”

“Nyuwo mwa Kristu, Mwaana a Muluku mukumi.”

⁸³ “Ooreeriwa ti nyuwo, Simoni, mwaana a Yona; erutthu n’iphome khewuupulululeni ila, masi Atithi Aka ari Wirimu. Vamwala va Miyo kinooteka-vo Ekereja Aka, nto mikhora sa mookhwaani khasinwerya oxintta yeeyo.” Masu a Muluku oowuupululiwa mwa erooho!

⁸⁴ Nwehe, Apeli, mwaha wo omwaamini Muluku, aahivaha mukuttho wooreeraxa. Nto mutthu-owaamini a mw’erutthuni uupuwenle wira saari miteko sa mmatatani mwawe yoowo, wira, ni mihokorokho sawe ni yoovaha awe yooreera owo aaruuhaly’awe, wira Muluku aamukupali, nto eyo yaahiruuha ekumulanelo.

Hiyo ninniphwanya wira Abrahamu ni Lothi yaahaana okhalana ekumulanelo.

⁸⁵ Ninniphwanya wira Moise ni—ni Datani, Kore, yaahikhalana ekumulanelo yeeyo.

Moise, ory’ene profeta ookhalihwa ni Masu a Apwiya, oolipiheriwa wira owo aahithanliwa wira akhale muhooleli aya a okathi, ni moota Abrahamu aalahenryawe itthu iya sothene,

nto va Moise aahiira oratteene ele Muluku aahimaly'awe wira yaamukhala, yaamwiiraneya.

Nto Kore, aryeene a erutthu, aatthuna ovenxa mutthenkeso eriyari aya. Owo aatthuna opaka nikhuru n'atthu. Ni Muluku khonvara muteko n'atthu siiso. Ennooniherya vaavo vo, mwa Yoolempwa eyo, ethoonyeryo ya mukwaha olelo, wira mutthenkeso kahiyo ele Muluku onrumaawe. Maana, Kore amalakaru opaka, owo iirale Moise, "Khamunreere wiikumiherya." Mwa moolumo makina, "Muthukumano wothene ti woowaarya! Vano, nyuwo muniira wira mwa oowaarya mekhiinyu. Khamurina ehakhi yo wira etthu ntoko yeeyo. Muneererya wiikhaliha mutthu muulupale. Hiyo othene n'owaarya. Hiyo othene n'ana a Muluku."

⁸⁶ Nto Moise khurukunxa muru awe khurowa. Owo khwira, "Pwiya, kiireke exeeni?"

⁸⁷ Muluku khwira, "Mwiivalaanihe ni yoowo. Miyo koophweeleya ni yeeyo." Vano Owo khwaamiry a mutthayani.

⁸⁸ Moone, yaahikhala ekumulanelo. Vankumanaaya eerutthu ni a erooho, kweekwe enkhala ekumulanelo. Okathi Yuta ni Yesu akumannanse aya, yaahikhala ekumulanelo: Mmosa, Mwaana a Muluku; mukina, mwaana a Satana. Siiso ntoko Kayini ni Apele, yaahikhala ekumulanelo okathi awo akumananse-aya. Mmosa aya aari mulipa-oosuka muhakhu wa ekereja, nto mukina Pastore. Voolikana ni vano, hiyo noophiyerya-tho nihiku nla, etthu emosaru. Muromolelo wa mw'erutthuni ni Mwaakameliwa a erooho a Kristu. Mwaakameliwa a erooho a Kristu t'ovirikanaxa ni mitthenkeso sa mw'erutthuni, mpakha vahikhanle-aya elikanyiheryo nnakhala.

⁸⁹ Vano nwehe, eerutthu kweekwe oneererya wiilikanyiha ni a erooho. Masi, ntoko mwa Yakope ni Esawu, khenrowa ovara etthu. Nnari. Vano, vaaphiyereryaka ovara miteko sooreera, miyo—miyo kinnaamini wira Esawu vekeekhai aari mutthu ooreera murima onvkana Yakope, vamaithoni va mutthu. Owo aaniphavela waakhapelela aithi awe; awo khayoon, profeta. Ni itthu iya sothene owo aaphavelaawe wira, masi nnakhala vo Esawu khuupuwenle wira owo waari muteko w'erutthu paahi. Owo uupuwela wira aamuwerya okela mwaha w'etthu iiraly'awe, omwiirela etthu yoooreera mutthu, yeeyo yaari saana. Masi Yakope, munepa awe wothene waari ophwanya ehakhi y'eyuulupale ele, nto ti yeeyo Muluku aasuwenlyawe mwa yoowo ya erooho.

⁹⁰ Nwehe, ni kweekwe ennimwiiriha ole a erutthu omunyokha a erooho. Eyo yaahimwiiriha Kayini omunyokha Apeli. Yaahimwiiriha Kore omunyokha Moise. Yaahimwiiriha Yuta omunyokha Yesu. Ni erowaka siiso. Eyo ennimwiiriha ole a erutthu omunyokha a erooho, ntoko Kayini wopaceryani

aamunyonkhe-awe Apeli, ole Muluku aakhenly'awe mukuttho awe, ni onniphavela waapwetexa.

Awo hata aneererya ohonona mwiirelo. Awo aneererya ohonona itthu sothene, okhala wira kehiyo hat'etthu woohikhala nrima. Eyo epacenrye mwa Kayini ni yaahooniherya wira naari nrima, ni eyo nlelo etthu emosaru olelo okathi a ephattu (a erutthu) ni a muroohoni amkumanaaya. Eyo ennooniherya wira ti Satana, khiyaavo enamuna ekina, okhala wira nrima ninkhuma wa Satana. Vano nto enniruuha etakiheryo ya Ekeekhai, mutthu oneererya otakiha etthu ohikhanlyawe, awo ahirumwe-aya wira yiire. Kavi ya yeeyo ninooonaahu mahiku ala ookiserya! Oh, wulu, kavi ya yeeyo!

⁹¹ Tivo hiyo ninnoona wira Muluku vo-...khonrukunxa nnakhala muupuwelo Awe vanaasiwa Masu Awe oopacerya. Masi, ole Owo onimwiitthanaawe, ti yoowo Owo onimukhalahaawe. Khaavo mukina onwerya okuxa nipuro nlo. Khaavo aawerya okuxa nipuro na Moise. Hata wira aKore akavi yaavenya, ni aDatani akavi; aari Moise, Muluku aamwiitthanne-awe, voohicala exeeni.

⁹² Masi, ni atthu yaaheette muhina mwa otthuna Wawe wooloka, Owo ohaana otthuna woohiyererya Owo onrowaawe woohiyani weetta-mo. Nwehe, Owo onoohiyererya, vaareera, masi Owo onimwiiriha ovara muteko wira okhale ovuwa Wawe, mwa otthuna Wawe wooloka. Vano nyuwo mwatthuna...

⁹³ Siiso ntoko, wopaceryani, khiwaari otthuna wooloka wa Muluku wira aana eyariweke mulaponi ni ekhapa. Nnari, mulopwana. Muluku aampattunxe mutthu mutthayani mwa elapo, khwiiseelela iphumu sa ekumi mwa yoowo, nto khukhala munepa mukumi. Khimukumiha mwa mulopwana yoowo namakhaliherya, khumpakela mwaar'awe. Iwo waari otthuna woopacerya ni wooloka wa Muluku. Masi vakenlyaya etampi khwiira etthu yiiralyaya, vano Owo khimutthuniherya mulopwana omuthela mwaar'awe, voophwanela, ni okhalana aana ni yoowo. "Mwaacerereyeke ni musareyeke mulaponi, nto, vakhala wira eyo t'inamuna enrowaanyu wira." Masi, moone, khonakhaleke otthuna Wawe wooloka.

⁹⁴ Tivo, itthu iya sothene saarina epacerelo sihaana okhalana emalelo. Etampi yothene ehaana ophiyerya omalamalihiwa. Etampi yothene ehaana omalamalihiwa. Tivo, oMileeniyu wuulupale okathi ohihimuwa onrwaaya, khaninrowa otthikela oyariwa-tho n'axitithi ahu n'aximai, masi Muluku ntoko Owo siiralyaawe wopaceryani onrowa omwiitthana mutthu okhuma vatthayani v'elapo, ni namakhaliherya awe ni yoowo. Ti yeeyo. Ti siiso Owo iiraly'awe wopaceryani.

⁹⁵ Vano tivo, Muluku khonrukunxa muupuwelo Awe mwaha wa etthu p'itthu, masi Owo onimoohiyani okelela ohoolo. Vano, nno orukurerya wuulupale wira kiphiyerye ele entthunaaka ohimya

va ya yeela. Masi, nto, masi, ti, nyuwo mu... Kintthuna wira mwiiwe saana. Munnona? Muluku onimoohiyani wira etthu, ni hata onimooreerihani mwiiraka, masi nlelo kuhiyo otthuna Wawe wooloka.

⁹⁶ Muluku aahimuhiya Isarayeli okuxa ekano, mwa Okhuma kapiitulu 19. Okathi mahala yaavahalyaaya profeta, Nripu na Mooro, mwaapwittipwitthi a mukuttho, oweriya wo ovuluxa, masi awo yaanlenle Ekano. Khuwaari otthuna wa Muluku, masi eyo yaahikelihiwa okhala wira mutthu aatthunne yeeyo. Nto owo aahitakhalihwiwa ni ikano seiyo owo aatthunne-awe.

⁹⁷ Ti yooreera okhalana otthuna wa Muluku. Ti yeeyo Owo oniixuttihalyawe. "Otthuna Wanyu wiireye. Omwene Anyu orwe. Otthuna Wanyu wiireye." Hiyo nihaana wiivaha mmansihu wa otthuna Wawe ni Masu Awe. Muhihoveryeke Yaawo. Mwaamini Yaawo. Muheereryeke ophwanya moota wo orukurerya. Mukuxe siiso ntoko sikhany'aya.

Anci-ene antthuna orukurerya, ophwanya ephiro ekina. Nto mwaairaka siiso, muniiphwanya murowaka, muniphwanya wira Muluku onnooreerihani, masi munvara muteko mwa otthuna Wawe woohiyererya nave kahi mwa otthuna Wawe wooloka, otthuna wa eMuluku.

⁹⁸ Owo onoohiyererya eyo, ntoko sihimaly'aka, masi Owo khon—Owo khonrowa ohiya okhala otthuna Wawe wooloka; masi Owo onimwiiirha ovara muteko wira ottittimihe ni ottotlopele otthuna Wawe wooloka. Ni oyariwa mwaana, mwaha w'ekhapa, ti emosa ya yeeyo.

⁹⁹ Vano nwehe, Mowabi, opacerya wene, naari nloko noohiphwanela. Naapacenrye, voohiphwanela, nave ni ti—tiithi oowaamini ni mwaana muthiyana oowaamini.

Voolikana, nyuwo mwalikanyiharu yeeyo ni orumeela muupuwelo wa muroohoni, munoowerya woona muromolelo weemenle vale vowooneya ntoko khula etthu. Vekeekhai. Moone, etthu yothe ne ti yoovonyeya voomalela. Ni, nwehe, yaaruhiwaka, empacerya siiso, khenkhalakhala... Enoothtikela, ntoko poola a nakhutu, eyo enoothtikela paahi evilikeyaka erowaka erowaka. Mwaira yoovonya emosa, ni opacerya ni yoovonya yeeyo emosa, ni munathikela nvilikeyaka etthu emosa ni ekina, ni etthu emosa ni ekina, yothe ne ottharana ekina.

¹⁰⁰ Nto ti siiso ekereja epacenry'aya. Ti siiso epacenry'aya oNicea, Rooma, okathi ekereja Katolika y'oRooma... Wopaceryani wene, eyo ekhummyaya-wo, aari Pentekosite. Masi vaiithokihalyaya khwaaruuha-mo atthu oottittimiheya, mukereja, awo khupacerya opaka, okhalana mavekelo, ni olompa ni etersu, ni—ni waavekelela alipa-ookhwa, ni itthu iya sothe ne sikina. Vano nto khupacerya ovilikeya, okhuma yoovonya okela mwa ekina, yoovonya okela mwa ekina,

mpakha nwehe vaphiyalyaya-vo. Khiyaavo hata ethoonyeryo ya pentekosite mwa yeeyo, nnakhala. Munnona? Ti yoovonya ekuxaka ekina, ekuxaka ekina. Eri etthu emosa paahi yo wira, eyo ti, okukuttha elepelo ni otthikela wopaceryani.

¹⁰¹ Okathi Martinho Lutero opacenyraawe ni okhalihwa naxariya...Ela yaahaana okhala ekereja Luteraana, yokelelaxa ohoolo. Munnona? Vakhala wira...Lutero, okathi owo otthokihaly'awe, owo khaawerya okupali oreerihwa wa Wesley, okhala wira owo aahiitthokiha; nto axilopwana awo khiyaavilela eyo, vano Erooho khukhuma-mo.

¹⁰² Vano, nikhuru na Lothi va; ahiiso, Mowabi aari mwaana a mwaana muthiyana a Lothi, oohiphwanela opacerya wene. Vano nwehe, ntoko ekereja y'erutthu, Mowabi, onthoonyerya muromolelo w'erutthu.

Isarayeli onthoonyerya Ekereja ya erooho. Isarayeli, yaahikhala ekereja y'ekeekhai, aari mwaakameliwa a nihiku nenle, aaitthaniwe okhuma wEjitu, ni oolipiheriwa okhala ekeekhai.

¹⁰³ Nwehe okathi awo, awo aili yitakanxale-aya. Oowaili aya yaavanhe mukuttho mmosaru, oowaili yaatenke, yaawoonale altaari athanu n'aili, oowaili yaavanhe mukuttho wooreera, enyompe. Nto awo hata yaahaavaha amwaapwittipwitthi, elipiheryaka wira aahikhala Mesiya aarowa orwa. Voophaveleya, awo oowaili yaari oolikana oratta-ene. Isarayeli, ohitto nno mukhatoni; Mowabi, osulu vantumuxani. Nto Mowabi ni altaari athanu n'aili; Isarayeli ni altaari athanu n'aili. Mowabi ni inyompe thanu na piili; Isarayeli ni inyompe thanu na piili. Mowabi ni ipwittipwitthi thanu na piili, alavulaka mwaha wa Mesiya aarwa; Isarayeli ni ipwittipwitthi thanu na piili.

Exeeni yaavirikanne mwa yaawo? Voophaveleya, oowaili yaari oratte-ene. Masi, moone, Mowabi khaarina olipiheriwa wa Muluku ni yaawo; awo yaari nloko paahi, nikhuru n'atthu oottittimiheya. Masi Isarayeli aahikhalana profeta ni yaawo. Awo yaahikhalana Mwala woomaniwa ni yaawo. Awo yaahikhalana Nripu na Mooro. Awo yaahikhalana enowa y'eporonse, ya openuxa. Awo yaahikhalana iparakha sa Muluku sirowaka ni yaawo, ni awo yaari aana a Muluku oowitthaneliwa okhuma.

¹⁰⁴ Vano ninniphwanya eyo ethoonyeriwaka voolikana saana va mukereja mmwe sa olelo. Masi, ni Mowabi khayaari siiso. Isarayeli aari nawetta, arowaka nipuro nnipuro; khula nipuro Nripu na Mooro naarowaaya, awo yaarowa ni Nenlo. Mowabi, khiyaari siiso; awo yaahiikhaliha mmuromoleloni mwaya, mulaponi mwaya. Awo khayeetta, awo yaakhala weiwe. Awo yaahikhalana oottittimihiwa aya. Awo yaahikhaliha itthu ntoko saathuneyaaya wira, ni yaahikhalana anakhotto aya,

yaahikhalana alipa-oowana aya, yaahikhalana mwene aya, yaakhelaaya-wo iworti saya, ni sikina.

¹⁰⁵ Masi Mowabi aahimoona Isarayeli ni etthu awo yahaarinaaya. Awo yaahoono owerya wuulupale eriyari ya Isarayeli, ni aari profeta. Nto profeta owo aari Moise. Ni yaanisuwela wira okathi ekhotto yahaarowaaya saana, awo yaavenxa matat'awe paahi khuvarelela osulu, nto ekhotto yaamurukunuwa. Vano ale khayaarina etthu siiso, tivo yaaphavenlyaya olikaniha ni ipoliitika, ni ikuru sa poliitika. Yaahiruma elapo ekina wira yamurentteri profeta wira orwe, wira ewerye okhalana profeta, ni wira akhalane owerya eriyari aya siiso ntoko Isarayeli saarinaawe eriyari aya.

¹⁰⁶ Munnoonna elikanyiheryo ya mw'erutthuni? Munniwerya woona ekereja y'erutthu olelo? Ehiira etthu emosaru yeeyo.

¹⁰⁷ Nwehe, vano, oowaili aya anrowa okhalana maprofeta. Evirikanelo yaari paahi, Moise, profeta a Muluku, Mwene awe aari Muluku. Ti weiwo owo aakhelaawe malamulo awe, Masu a Apwiya. Ni Palaamu, owo nave, aahikhalana mwene, nto mwene owo aari Palaki, mwene a Mowabi, nto ti weiwo owo aakhelaawe malamulo awe ni iparakhha sawe. Tivo Mowabi aahimuhimeerya Palaki, "Murwe," ahiiso Palaamu, iirale, "murwe mwaatakhalihhe atthu ala, okhala wira awo annikhuneela elapo yothene ya vathi. Awo animoorwa ni olata sothene ntoko emompe enlataaya malaxi." Khwira, "Murwe naanaano va. Ni kinnisuwela wira munniwerya otakhaliha, munniwerya oreeriha, khula etthu muniiraanyu ennikipaliwa."

¹⁰⁸ Vano, hiyo ninthuna niwehe wira mulopwan'ola aari profeta ookhalihwiwa a Muluku, masi owo aahitumiha ihaakhi sawe s'eyuulupale mwaha wa niwoko na poliitika. Siiso ntoko ekereja yiiraly'aya olelo, ntoko Lutero, Wesley, Pentekosite, ni nikhuru nothene na yaawo, aatumihha mwaha wa soowunlela mmutthenkesoni mwaya. Moise, vathi va Muluku; Palaamu, vathi va Palaki. Nnakhala vo, maprofeta oowaili yaari axilopwana owiitthaniwa ni Muluku, ni oowaili a erooho. Nwehe evirikanelo. Khula mmosa aahikhalana muru: wa Moise aari Muluku, wa Palaamu aari Palaki.

¹⁰⁹ Nwehe va moota ya erooho eniheliliwaaya, wira yooniherye wira y'erutthu ti yoovonyeya. Moise, oorummwa ni Muluku, mmutekoni, onookumananiwa ni opaciwa ni profeta mukina a Muluku. Munniwerya otthokelela yeeyo! Moise, owiitthaniwa ni Muluku, oorummwa ni Muluku, eemenleene mmutekoni mwa Muluku; aaheetta eriyari ya nikhuru nla, nooriirya nookhaleleya, ni aahipaciwa ni profeta mukina a Muluku, ole Muluku aamureerin'he-awe ni omukhalihha. Mwaarowa osuwela sayi evirikanelo? Awo oowaili yaahikhalana maprofeta. Muluku aanilavula ni maprofeta oowaili.

110 Nto akina aniira, “Muluku iirale, ‘Mwiire *ela*.’ Muluku iirale, ‘Mwiire *ele*.’” Vano, miyo nkinihoverya eyo, masi eri ota wa eliinya ya Masu a Muluku. Profeta, vohicala wira owo profeta, owo ookhuma mphironi. Atthu anci-ene anotothiwa siiso. “Oh, munna *ola* onniwerya wira *ela*, ni munna *ola* onniwerya wira *ele*,” n’ukhootta Masu?

111 “Hata kilavulaka ilavulelo s’atthu ni malaikha, hata kikhalanaka soovaha, kinweryaaka othaamiha miyaako, hata kivahaka mihakhu saka sothene wira alyihiwe atthu oohaawa, nlelo nkhiyo etthu.”

“Anci-ene animoorwa wa Miyo nihiku nlo, yiire, ‘Pwiya, Pwiya, miyo nkilaleenrye mwa Nsina Nanyu? Miyo, mwa Nsina Nanyu, nkiwoomonle axetwani ni nkivanre miteko suulupale?’ Vano Miyo kinoowiirela, ‘Mukhume, nyuwo... Mukhume wa Miyo, nyuwo muniira sootakhala. Miyo nkinatoko woosuwelani.’” Nnakhala vo, awo anoorwa ni ehimeryo wira awo yaahiira, masi Yesu ohimnye wira awo anamwiira sotakhala. Yootakhala exeenii? Etthu munsuwelaanyu wira muhaana wira, eyo ekeekhaii, nnakhala vo nyuwo khamuniira. Munnoona enrowa okhala exeeni mahiku ookiserya?

112 Mwiiwe eliinya yothene! Eyo yaari etthunelo aka ohiy’ula. Miyo kihimnye wira kaamukhuma ewoora ya neethanu na xexe, masi kinoorowa ovira vakhani, khino. Nkawehani, eyo yaari etthunelo aka yothene, wira kiwooniheni eliinya *ela*, ni Masu a Muluku, moone, wira—wira Muluku ohaana osuka Masu Awe wira akhale Muluku.

113 Vano, hiyo ninniweha wira oowaili ala yaari atthu a erooho, oowaili yaari maprofeta, oowaili yaahitthaniwa. Nto Moise, oryeene mmutekoni, ni Nripu na Mooro na naanaano ohoolo wawe khula nihiku, Erooho ya Muluku mwa yoowo, oryeene mmutekoni. Va onoorwa murumeyi mukina a Muluku, oowitthaniwa ni Muluku, ookhalihwa ni Muluku, profeta yoowo animurweela Masu a Muluku. Va ti vari eliinya yoowoopiha. Khaavo mutthu aawerya ovaanyihana wira ole aari mutthu a Muluku—a Muluku, okhala wira Biblia ohimnye wira Erooho ya Muluku yaahilavula ni yoowo, ni owo aari profeta. Masi, moone, okathi aakhenlyawe waakhula w’ekeekhai wa Muluku, khaatthanre. Owo khawehale, vano owo aahirowa omutharamula Moise.

114 Vano, Palaamu aahiphavela otthuna wa Muluku, ni murima wothene. Vano, okathi mulopwan’ola muulupale orwiiyaawe khwira, “Palaamu! Palaki mwene ooruma, wira nyuwo murowe wa yoowo vohipisa ni mwaatakhalihwe atthu ala Isarayeli, okhala wira awo aamwareela mapuro othene a mulaponi, nto vano awo anikhaliha maxaaxa aya akivirikanyaka miyo. Ni aalata khula omwene okhanle, vathi vaya. Nto vano hiyo nintthuna wira nyuwo murwe mwaatakhalihwe atthu ala. Okhala

wira, kinnisuwela wira nyuwo mwamutakhaliha mutthu, owo onootakhaliwa.” Vano, moone, owo aari mutthu a Muluku. “Ele enreerihanyu, enooreerihwi.” Owo aari murumeyi a Muluku.

¹¹⁵ Nto Palaamu vano aahuupuwela, oryeene profeta, “Eri etthu emosa paahi ya miyo wira, nto iwo ophavela ole okhanle otthuna wa Muluku.”

¹¹⁶ Owo ti muteko wa profeta, vakhala-ru wira ohitthaniwa wira akhale profeta. Yoopacerya, profeta ohaana wira exeeni? Ophavela otthuna, Masu a Muluku. Owo ohaana wira. Okhala wira, oryeene profeta, Masu a Muluku animurweela yoowo. E. . . Eniiriwa, “Ahe, nyuwo khamuhiyo teyooloku.” Khanivo hata nipuro Bibilia onihimyawe wira Masu a Muluku animurweela teyooloku. Awo t’ale antepanya. Masu animurweela profeta a Muluku.

¹¹⁷ Nto va aari mulopwana mmosa aari profeta a Muluku. Nto okathi ophwanyiswa mwaha wa muteko, wira olempwe, wira arwe aatakhalihwe atthu akina a Muluku, nwehe, owo aahrowa ophavela otthuna wa Muluku. Ni owo aatthuna osuwela otthuna Wawe wooloka, nto Muluku khunvaha otthuna Wawe wooloka. Otthuna Wawe wooloka aahooniheriwa. Exeeni waari otthuna Wawe? “Muhirowe!” Awo Masu oopacerya a Muluku. “Muhirowe ni yaawo. Muheererye waatuphela atthu Aka, aneettela iphiro Saka sooloka.”

¹¹⁸ Moota ery’aya siiso olelo, otthuna onyakulihana, ovaanyihana, ni itthu sothene sikina, okathi awo anoonaaya Erooho ya Muluku evaraka muteko eriyari anyu. Nto awo aneererya o, awo aneererya mwa miyaakha, ovuvurya. Masi vantepaaya ophavela ovuvurya, Awo antepa wunnuwa. Khimukhanle otakhalihaka ele Muluku oreerin’haawe. Khamukhanle tu. Khamukhanle wiiraka tu.

¹¹⁹ Tivo, moone, awo yaari atthu a Muluku. Vano, profeta ole, onaamwi aari osulu iwe ni oophwanyiswa ni mwene, aavara muteko eriyari ya atthu oottittimiheya, ni siiso. Ni Masu a Muluku yaahimurweela. Owo ahiphavela otthuna wa Muluku, ni otthuna wa Muluku waahimwaakhula, ni khwira, “Muhaatakhalihwe atthu ala. Miyo kihaareeriha.”

¹²⁰ Vano khokhanle teyooloku vathi v’erimu onwerya okhootta Mutthak’ola hiyo onlaleyaahu, ni ohimya wira Awo kahi Masu a Muluku voolikana mwa okathi aya. Muluku onilipiheriwa mwa itthu sothene sihimmwe wala siiriwe, Owo ohooniherya okhala ekeekhai. Vano, khaavo teyooloku, hata nammusoma Bibilia, nnakhala profeta, onwerya oweha Masu awo, owo akhala-ru profeta, onimoona etthu emosaru. Masi owo aahooneke etthu emosaru yeeyo, enooniherya wira yookhala etthu evonyeiyee. Okhala wira. . .

¹²¹ Nyuwo muniira, “Ahe, oh, miyo kaamuwerya okuxa eyo enamuna ekina.” Nave, Palaki, Palaamu yaaniweryasa. Munnona? Masi Muluku aamusuwanyehale Moise.

Vano nto exeeni yaari eyooniheryo? Masu a Muluku. Ni owo aahiiwa etthunelo yoowooneya yoolikana ya Muluku, “Muhirowe. Muheererye o—otakhaliha etthu Miyo kireerihalyaka. Awo atthu Aka.”

Masi moosuwela? Palaamu khaasiveliwa n’atthu ale, opacerya wene. Oh, exeeni...aPalaamu akavi ari molumwenkuni olelo! Owo khaasiveliwa nnikhuru nle, opacerya wene.

¹²² Vano, vaamanlyaawe waakhela etthunelo yoowooneya ya Muluku, “Muhirowe,” masi, moone, ohiya wira yeeyo, yaari siiso ni Kayini, ntoko Kore, owo aarina nrima, nto owo—owo aathuna, niwoko wira arowe, khula enamuna.

¹²³ Nwehe, nipuro nuulupale na muromolelo awe, nuumala orumwa, iirale “Nnari, kinoona wira nkinrowa. Kinoona wira nkinrowa okhalana naata n’awo. Miyo nkinrowa ovaanyihana n’atthu ale, okhala wira Muluku ookileela wira ale atthu Awe, ni kinoona wira nkinrowa.” Owo aakhanle—ru ni yeeyo!

Masi, muhina mmurimani mwawe, owo khaasiveliwa n’awo. Munnona? Awo khayaari a nikhuru nawe. Ni etthu p’itthu yahiira mpantte wa nikhuru nawe, “khiyaari yoolikana, opacerya wene.” Munnona? Nto owo aahaaweha, khwira, “Sookhala itthu kamosa-kamosa sootepa atthu ale yiiraly’aya. Vekeekhai Muluku oowaarya onimwaatakhalaha atthu ntoko ale. Awo t’a—awo t’ohisuwel’etthu. Awo kahiyoo oosoma ntoko hiyo. Hiyo n’atthu oosuwelaxa. Oh, anihimya wira annimurumeela Muluku, masi, nkaaweheni, awo axeeni? Nikhuru na, vano, nikhuru na ipottha, anamawolowa marove, atthu a wEjitu awoomonle-aya iwe. Vano, Muluku khaarowa okhalana naata nnikhuru noonanara ntoko nle!”

¹²⁴ Owo aahivonya woona Mwala ole woomaniwa ni enowa ele y’eporonse, Nripu nle na Mooroo. Owo aathuna waalamula mwa moonelo mmosa w’olakeya. Owo aahivonya woona wiitthana wuulupalexa wa Muluku. Ni mahala, mwaha w’oathanliwa, awo yaarisa muliinyani mwemmo, nave ni Masu a Muluku. Nto okathi owo aathunaawe waatakhalaha, Muluku iirale, “Muhiire siiso. Awo t’Awaka. Mwaahiye. Muhaakwannye.”

¹²⁵ Vano, nto mulopwan’owo khurukunuwa, khutthika. Vano nkawehani nipuro nuulupale na muromolelo awe, nnya, okathi otthikalyawe. Awo yaarumme nikhuru noovaraxa murima. Ekwaha ela siiso yaakhanle, ohiya anamakhalela paahi, khino yaari matotori a divindad jaarwiye ekwaha ela. Siiso yaari mapixipu, wala khino ahumu a estaatu, wa sothene...Owo aarumme ni—ni—nikhuru nooreerela, ni ni—nikhuru noovaraxa murima, mutthu aasomme vooreerela vakhani ni aawerya

omooniherya ethhokiheryo yoolokaxa, aawerya wooniherya voothhokeleleya.

¹²⁶ Moone, ti yeeyo Kayini iiraly'awe; owo aarootthokelela. Ti yeeyo Kore iiraly'awe; owo aarootthokelela. Kahi ole onthhokelela.

“Hiyo ninoohiya otthokelela.” Hiyo nimmwaamini Muluku, voohicala ele etthu ekina enihimyaya. Hiyo ninnimwaamini Muluku. Hiyo khaninthhokelela ele Muluku enihimy'awe. Nyuwo khimukhanle otthokelelaka eyo. Nyuwo muhaana okupali Yeeyo ni waamini. Ni khula etthu munsuwelaanyu, khimurina otthokelelaka-tho. Nkisuwenle moota Owo oniiraawe; miyo kinaamini paahi wira Owo onniira. Nkisuwenle moota Owo onrowaawe omusuka natiri uwo; masi Owo ohimmye wira aamwiira. Miyo kinnaamini. Miyo kinnikupali eyo va mulipiheryo kinaamini aka wira awo Masu a Muluku.

Nyuwo muniira, “Ahe, eyo khenrowa ophiyerya.” Nkisuwenle sinto enookiphiyerya wala nnari, masi Owo ohimmye wira, “Muhimye.”

Miyo kinnimuupuwela pastore aka muPatista aakileenle, khwira, “Vano, Billy, munoolaleerya mapotto mukereja. Vano, munuupuwela wira ookhala onrowa wiiwa etthu ntoko eyo?”

Miyo khwira, “Muluku ohimmye siiso.”

“Munrowa wira sayi, n'usoma wa ekalaase ya neethanu neili, waavekelela mamwene, ni olaleerya mulaponi mothene?”

¹²⁷ Miyo khwira, “Nkisuwenle moota onrowaaka wira, masi, Owo ohimmye siiso, ni eyo ti yookiphiyerya.” Munnona? “Owo ohimmye siiso. Nkisuwenle moota enrowaaya wiriwa.”

Owo khwira, “Munuupuwela wira atthu molumwenkuni mu, muulupale woosoma munrowaanyu okumanana, mwa mwah'ola wa ovoniha wa Muluku ni sikina, munuupuwela wira awo anoorowa waamini yeeyo?”

¹²⁸ Miyo khwira, “Kuhiyo mwaha aka miyo osuwela sinto awo animwaamini wala nnari.” Miyo khwira, “Muteko aka olaleerya Yoowo. Ti yeeyo Owo okihimenryawe. Owo ohimmye wira aamukhala ni miyo, ni Owo ookileela etthu yaarowaaya wira.”

Ni ahiira siiso Owo aahimmyawe wira yaamwiira. “Yoopacerya, nvare matata aya; nto enimwiiraneya wira nyuwo munrowa osuwelaka hata isiiri sa mmurimani mwaya.” Ni miyo kaahooleelani yeeyo, khwiiraneya siiso. Eyo eniira sayi? Miyo nlelo nkinsuwela moota eniiraaya. Owo kuhiyo mwah'aka moota eniiriwaaya; ti wii ehiiriwa paahi.

¹²⁹ T'ani aawerya olakiherya okathi Muluku aamuhimenry'awe Eliya, “Nwele iwe mwakilaathi vamwaako, nto Miyo kinimoolyihani. Miyo kihaaruma ana—anakhuku wira yoolyiheni”? Moota xeeni nakhuku aakhanlyawe okuxaka nipattuuxa na ephawu ni nipattuuxa—nipattuuxa na ehopa,

yoowoosiwa, khumuruuhela profeta? Eyo ti yoovikana khula etthu kaakhanlyaka olakiheryaka. Nkinuupuwela wira nyuwo munoowerya, nnakhala. Masi Owo aahiira. Eyo ti yothene yaathuneya. Owo aahiira, ni eyo ti ekeekhai ya yeeyo.

Moota Owo iiraly'awe, miyo nkisuwenle; kuhiyo mwah'aka. Masi Owo aahiira. Moota Owo opanke-awe elapo, miyo nkisuwenle; masi Owo oopaka. Moota Owo onveleelinhe-awe Mwan'Awe, miyo nkisuwenle; masi Owo ohiira. Moota Owo ohihimuwaly'awe mw'alipa-ookhwa, miyo nkisuwenle; masi Owo oohihimuwa. Owo okooponle sayi? Miyo nkisuwenle; masi Owo okoopola. Ti yeeyo. Owo oowooponleni sayi? Nkinwerya wooleelani; masi Owo ohiira. Owo okivoninhe sayi? Miyo nkisuwenle; masi Owo ohiira. Owo aahihimya wira aamwiira, ni Owo onnimaliherya Masu Awe.

Vano, Palaamu aahaana wira osuwenle yeeyo, ni owo aanisuwela etthu aarinaawe wira.

¹³⁰ Nwehe, nikhuru nla nooreerela, noovara murima, naarwiye, ni noorerelaxa exeeni? Awo yaarina soovaha sooreera. Ni kahi yeeyo paahi, awo yaaniwerya onvaha musurukhu, ni yaaniwerya, yaahinvaha opuro wooreerelaxa. "Vano, ohiya mulaleyi pure paahi mmutthenkesoni, hiyo nnimookhalihani mulipa-oowehaxaxa a etistritu. Munnona? Wira, ni—ninoowiirelani etthu mwawoomola-ru paahi athhu ale vale, moone, ni weemexa ele." Oh, awo yaahinvaha opuro mulupale. Yiirale, "Vantepaanyu oreeriha..." Khwira, "moosuwela, kinoowerya woowelihani." Nkawehani vatthu vanaakhelaawe moolumo awe, muru wa elapo.

¹³¹ Moise aakhela vayi Masu awe? Mwene a Wirimu. Mmosa aari Masu a natiri a Muluku, "Miyo kinimooroihani muttette wa natiri, ni khaavo onrowa okhala ohoolo wanyu. Miyo kinooveleeliha miwi ohoolo wanyu ni kinimwaakumiha, moonoo woolopwana ni woothiyana. Ni munoorowa okuxa muttette. Koolaihe-...Miyo kihoovahani. Rowakani, mukuxe, mwakuxe; ti wawinyu." Nto vano, moone, owo ti Ole Moise aanwiriyanawe. Nto mulopwan'ola aanwiriyan mpakha ophiyererya etthu mmurimani mw'awe yoowo owo aarinaawe ehace ya yeeyo, nto siiso owo khurrowela muru awe wa enamukuttho. Munnona?

¹³² Nwehe, nipuro nimosa nooreera. Owo khwira, "Nyuwu moosuwela wira kinniwerya woowelihani? Kinimoowelihani nipuro nooreera. Kinoowiirelani sinci-ene. Kinimwaacererya nlevelo nanyu. Kinimoovahani nlevelo nooreeraxa." Nto vanvahalyawe sothene iya, saahimukhalihani oochoona.

¹³³ aPalaamu akavi akhanle molumwenkuni olelo, wira, mwaha wa voopuroni vooreeraxa, ekereja yooreeraxa, olaiheriwa etthu! Mutthu athukuwaru maitho wa Masu ni miteko sa Muluku... Nto mulopwan'owo ooreera murima, orina ovara murima,

onopacerya ntoko murumeyi a Muluku, ni onookhalana muthukumano wooreera. Nuvira okathi vakhani, opatiiso wa Erooho Yoowaarya onimooniheriwa; opatiiso mwa Nsina na Yesu onimooniheriwa, ekhanle Yoolempwa ni enamuna emosa paahi ya Yoolempwa yo opatisa. Nto okathi onooniheriwaawe, ni muromolelo onasuwela wira awo onoorowa waapweteya yoowo okathi owo onipacery'awe yeeyo, awo aninvaha opuro wooreeraxa ni erukunxelo mukereja. Moone, Palaamu a khalayi, emaara ekina, siiso ntoko saary'aya wopaceryani.

¹³⁴ Vano, mulopwan'owo onimusoma Bibilia, owo khokhanle omusomaka ohoonaka wira eyo Ekeekhaii. Khaavo mutthu otonko opatisiwa sittharihiwaka ititulu sa "Atithi, Mwaana, Erooho Yoowaarya." Eyo eyaaminelo y'eKatolika ni kuhiyo Mwixuttiho wa Bibilia. Khaavo mutthu mBibiliani otonko opatisiwa, mpakha miyaakha imiya ttharu nuumala okhwa wa murummwa ookiserya, ahaapatisiwe mwa Nsina na Yesu Kristu. Ekereja Katolika t'epacenrye eyo, nto akina aya khuttharela. Ni khula murumeyi okilantho oskritooryu wawe ni onrowa oweha yeeyo, onnisuwela wira eyo Ekeekhaii, masi mwaha wo osuweliwa, wira ovarelele opuro awe, okhalane wuupuweleliwa vooreera eriyari y'atthu, owo onosakaleliha.

"Ahe," nyuwo muniira, "Muluku oomureeriha."

¹³⁵ Vekeekhai, akina aya aakhalana soovaha so ovoniha, akina aya aakhalana ikampaanya suulupale. Ni eyo wiitho waya voomalela, ni amphwanya waakhula omosaru wa Masu a Muluku nyuwo wala khula mutthu aarowaawe ophwanya; Muluku khanrukunuwa. Munnoona enihimy'aka?

¹³⁶ Palaamu, mwaha wa opuro wooreera, owo uupuwenlyawe. Vano nwehe, okathi nikhuru nlo nooreera nitthinke-aya, yooreerela . . . Palaamu, va, aakuxale yoohimya yoowootha. Munnona? Owo iirale . . . Ni—nikhuru nooreerela nihoorwa, owo—owo aahaana wira, "Mukhume ohoolo waka! Miyo kichoolelani Masu a Muluku. Muroweke! Ela ti SIISO ANIHIMYA T'APWIYA." Masi, moone, soovaha, ni mwaha wo okhala mutthu oosuwelaxiwa!

¹³⁷ Oh, moota onaasivelaaya wira! "Hiyo nnimooroihani mulaponi mothene. Hiyo nnimoovahani nteeke n'omeekha. Hiyo ninookhaliherya mithukumano sanyu mapuro othene nyuwo paahi mwa . . ." Oh, nnari. Uh-huh. Munnona?

Hiyo noosuwela ele Masu anihimy'aya. Hiyo noosuwela etthu Muluku ohimmy'awe. Ninrowa okhala ni yeeyo, ni mukhaliheryo wa Muluku. Munnona? Voohicala enamuna xeeni ya natiri, ni eyaattelo xeeni akhanlyaya olivaka, ni kavi sa *ela, ele*, wala *ekina* mukhanlyanyu—mukhanlyanyu okumiheryaka; hiyo ninthuna SIISO ANIHIMYA T'APWIYA, ni etthu Owo ohimmy'awe *Va* toko.

"Ahe, ekereja ehimye wira, 'Eyo ti yaneili.'"

Hiyo ninthuna ele Muluku ohimmyawe woopaceryani. “Ni etthu p’itthu yaacereriwe Mmo wala okumiha Mmo, hata nsina nanyu ninookumihiwa Muliivuruni mw’Ekumi; waacererya nuulumo nimosa Mmo, wala okumiha Nuulumo nimosa Mmo.” Hiyo ninthuna ele Owo ohimmy’awe; kahi ele ekereja ehimmy’aya, ele Totori Jones ohimmy’awe, etthu mutthu mukina ohimmy’awe. Hiyo ninthuna ele SIISO ANIHIMYA T’APWIYA ehimmyaya, ele Masu ahimmyaya.

¹³⁸ Masi vano hiyo ninnimphwanya Palaamu, murumeyi a Muluku. Ni anci-ene a alopwana awo anoopacerya, ni anikhalihiwa ni Muluku, ni annilavula Masu a Muluku mwa itthu sinci-ene; masi yaaphiyeryaka Ekeekhai yothene, kharrowa wira.

¹³⁹ Nwehe va, ntoko profeta a Muluku, owo khaarina wira aikelinhe-ene nikhuru ntoko nlo, opacerya wene. Owo khaarina wira oronwe-ene ni yaawo. Masi, nwehe, mwaha wo osuweliwa, moone, mwaha wa akhili awe, owo iirale, “Ahe, mukhale ohiyu wothene, nto kinimweehererya-tho.” Moone, “Kinimweehererya-tho”? Muntthunela-ni weehererya-tho?

¹⁴⁰ Muluku aahimuhimeerya etthu yo ohimya. Muluku iirale, “Mwaaleele wira khamunrowa.” Awo Masu Awe oopacerya. “Miyo nkinrowa. ‘Ni muhirowe. Muhitakhalihe etthu Miyo ereerihale-aka.’” Vano nkawehani moota yaamuhokolowenyaya, nuuvira okathi vakhani. Munnona? Ni enimwiira, khula okathi. Okathi Muluku onihimy’awe etthu, Owo onihimya yeeyo. Owo khonrukunxa muupuwelo Awe wa yeeyo. Owo onikhala ni Masu Awe. Vohicala etthu mutthu mukina onihimy’awe, Owo onikhala siiso ni Masu awo.

¹⁴¹ Vano, Palaamu aahaana wira osuwenle saana. Owo aahaana wira aikumihale mooxirikhani mmo. Masi soovaha iye sothene sooreera ni natiri a mwene ola, khwira, “Moosuwela wira kinniwerya wira. Miyo ka pixipu. Miyo kinniwerya wira etthu p’itthu entthunaaka, ni miyo kinimoowelihani nyuwo mwarwaru mukiirela yeela.”

Ni Muluku aahimuleela, “Muhiire.”

¹⁴² Masi nnakhala vo Palaamu iirale, “Nyuwo, nyuwo mukhale ohiyu wothene, ni miyo ki—kinimweehererya-tho.”

Moone, owo aahikhalana Masu. Khamurina yo onyakulihanaka-tho mwaha wa Yaawo. Muluku ohimmye siiso. Ni nikhuru ntoko nlo, awo kweekwe anooxintta yookumihakani mwa otthuna wa Muluku, nyuwo mwaatthuniherya-ru.

¹⁴³ Naahikhala nikhuru nimosa naarwiye wa profeta mmosa, emaara emosa, aaitthaniwa Yobi. Awo khiyaawenrye omuhapuxa. Owo aahoona yoowoona. Owo aanisuwela etthu yaari yooreera.

Palaamu aahoona yoowoona, nave nlelo khuhikhala ni Yeeyo.

¹⁴⁴ Khivaacila moota xeeni makhuru awe a mukereja yaahimiyaya, “Oh, Yobi, nyuwo mwaahaana wira *ela*, mwaahaana wira *ele*.” Hata amwaar’awe, owo iirale, “Munlavula ntoko mutthu oovahuwa.” Munnona? “Koosuwela etthu Apwiya ahimmyaya. Koosuwela etthu Awo avekenly’aya, nto ti yeeyo kiiraly’aka.” Moone, owo aakhanle n’ile Muluku aamuhimenry’awe.

¹⁴⁵ Nwehe, Palaamu arumeelaka yoohimya ela yoowootha mwaha wa akhili awe. Munnona? Owo iirale, “Ahe, kino—kinoosuwela. Kinimwehererya-tho.” Vano, ti vaavo vanrwaanyu, vaneili. aPalaamu akavi nrinaahu ohiy’ula, onaasivela orumeela voowootha yoosoma eyo ya Matewu 28:19 mwaha wa akhili aya paahi? Akavi antthuna omurumeela Malakhiya 4 mwaha wa akhili aya? Akavi antthuna omurumeela Luka 17:30 mwaha wa akhili? Akavi antthuna orumeela itthu iya, masi, “Ahe, miyo kinimoollelani, miyo—miyo kookupali wira awo othene arimwiitepanya mwa Yeeyo?”

¹⁴⁶ Vano nto va aari Palaamu aphaavelaka ohimya wira, “Khino Muluku orimwiitepanya. Kinimwehererya-tho, moone, koone etthu Owo ohimmy’awe.” Vano, Owo onnisuwela murima anyu. Nwehe, Palaamu arumeenle yoosoma ela voowootha mwaha wa akhili awe, okhala wira, vekeekhai, owo aatthuna musurukhu owo. Owo aatthuna nttittimiho owo. Owo aatthuna yeeyo. Owo aatthuna muteko owo. Owo aatthuna opuro ole, wira attittimihiwe, ntoko Totori *Lexe ni lexe*. Tivo owo—owo—owo iiralyawe, “Kinimwehererya-tho.”

¹⁴⁷ Oh, aPalaamu molumwenkuni ohiy’ula, mapuro oolaiheriwa, osuweliwa! Oh, wulu! Awo ankhwiha nantiirya muupuwelo aya ni seiyo. Mwaha wa miromolelo saya, awo aniira, “Mwaira *yeeyo*, munimoomoliwa. Koosuwela wira nyuwo mwa mutthu ooreera murima, ni hiyo ninnoophentani,” ni tthiri owo mutthu ooreera murima, “hiyo ninnoophentani. Masi khimukhanle olaleyaka yeeyo. Mu—mwiixuttiho ahu nihimya wira muhiireke yeeyo. Totori *Lexe ni lexe* ohimmye wira ela t’inamuna erinaaya okhalaka. Vano muhaana waamini siisa, mwakhalaru ni hiyo. Vano, nyuwo mwatthuna vale, miyo koosuwela wira moovira okathi woolipa, ahe, kinimoona sinto nkikhanle woowelihakani, khino opatili ekereja.” Oh, nyuwo Palaamu! Mwaasuwelaka otthuna wa Muluku, mwiire! Muluku khonrowa orukunxa muupuwelo Awe. Nnari.

¹⁴⁸ Etthu emosa owo aakhanlyawe oviraka vasulu, Ekeekhai, wa orummwa wawe. Owo iirale, “Ahe, kini—kinimwehererya-tho.” Nkaaweheni aPalaamu akhanle.

¹⁴⁹ Tivo vano muupuwele, okathi owo orwiiyaawe ohiyu wa neili, ni athu ala oottittimihiwa saana, muupuwelo awe wiira

okhanle-ene woonyoonyiha ni wookhwa nantiirya, Muluku khimuhiya orowa. Vano, Muluku khonarukunxeke muupuwelo Awe, masi Owo aanvahe otthuna Wawe woohiyererya. "Rowakani ohoolo weeso." Masi owo khusuwela wira khenrowa ovara etthu.

¹⁵⁰ Muluku aahisuwela etthu yaari mmurimani mwa Palaamu. Onaamwi aari profeta, Owo aanisuwela wira owo aanaanyokha masantu ale oophirikeya, ni owo—ni owo paahi...owo—owo aarowa otthuna waatakhalaha, khula enamuna. Ni Muluku aahimuhimeerya wira ahiire, masi nnakhala vo owo aahirwa, atthunaka wira, emaara ekina, tivo Muluku aahimuhiya orowa. Muluku irale, "Mukeleleke ohoolo." Vano, muupuwele, Owo khaarukunxale muupuwelo Awe.

¹⁵¹ Nwehe, waari otthuna wawe waatakhalaha. Athhu owo aahimyaawe okhala anamathipelela, owo aathuna waatakhalaha. Owo aathuna opuro. Owo khaathuna opwetexa okathi ni yaawo, tivo owo uupuwenlyawe wira aamuwerya omwiirela yaamukhaani ela mwene, nto aanwelihiwa. Muluku khaarukunxale muupuwelo Awe nnakhala Masu Awe.

Masi Owo onimoovahani entthuna murim'awe, murima anyu. Owo oolaiherya yeeyo. Moosuwela yeeyo? Owo oohimya woovahani entthuna murima anyu. Ni muhiye otthuna wanyu okhale Masu a Muluku. Otthuna wanyu okhale otthuna Wawe, ohikhale otthuna wanyu mmansinyu. Otthuna Wawe! Vakhala wira Owo...Nyuwu mwanvekela etthu, Owo kuhuovahani, mwiire, "Kooxukhuru, Pwiya. Nyuwu moosuwela ekhanle yooreera."

¹⁵² Nkanweheni saana Mwene Ezekiya, okathi Owo aamurumme-awe profeta orowa wa yoowo, Muluku aamurumme-awe, khwira, "Mulokiherye etthoko anyu. Munrowa okhwa."

Ezekiya khurukunuwela exiri khunla vooriipiha-vo murima, ni khwira, "Pwiya Muluku, miyo—miyo kinoovekelani wira mukuupuwele. Miyo kinneettaka ohoolo Wanyu ni murima wooloka. Kintthuna wira Nyuwu mukitthuniherye kikhale-tho miyaakha muloko ni mithanu."

¹⁵³ "Vaareera." Muluku khulavula ni profeta, khwira, "Mutthike mwamuhimeerye wira koomwiiwa."

Nto owo irale exeeni? Owo aahiruuhela otakhaliwa elapo yothene. Owo aahipattiha oviruwa wa Muluku mpakha vaakhanlyawe omwiivaka. Ti yeeyo. Nyuwu munnisuwela eyo. Aahimuhiya Muluku. Yaamukhala yooreera saana, wa, elapo, mwene, ni othene, owo aakelenle ohoolo ni okupali etthu yoopacerya Muluku aarinaawe wa yoowo.

Masi yooneya okhala yoolipa wa profeta, okathi profeta waarinaawe otthikaka omulavulela Masu a Muluku,

vaamanly'awe omuleela. Masi Muluku iirale, "Mukeleleke ohoolo." Masi, moone, eyo yaahiruuha otakhaliwa.

¹⁵⁴ Exeeni Palaamu iiraly'awe? Omanle-ene osuwela otthuna wa Muluku, nnakhala vo owo aahikhanyererya, owo aarowa wira, khula enamuna. Nto eyo yaakumihenrye exeeni? Nwehe. Owo khaarukunxale muupuwelo Awe. Owo aanisuwela etthu yaari mmurimani mwawe.

¹⁵⁵ Moosuwela, Tome, emara emosa owo khaawerya waamini tu. Nnari, owo—owo iirale, "Nnari, nkinwerya waamini yeeyo. Kaawenrye-ru ohela ntata naka mpararini mw'Awe, okwannya ipereku mmatatani mw'Awe, ahe, nto, nto kini—kinimwaamini nto."

Owo khwira, "Murwe va, Tome. Munnona? Vano muhele matata anyu va."

Vano, oh, vano Tome khwira, "T'Apwiya aka ni Muluku aka."

¹⁵⁶ Khwira, "Ayo, nyuwo muhona, nto vano munnaamini. Aatepa otthuvuliwa ale, ahinatoko woona nnakhala vo annaamini!"

Atthu imaara sikina khandthuna waakhela Erooho Yoowaarya ehikhanle wira anoolavula ilavulelo. Miyo kinnaamini olavula ilavulelo, vekeekhai. Owo Muluku ooreera murima; Owo onimoovahani entthuna murima anyu. Masi hata wira munlavula sayi ilavulelo, nave khunakhootta Masu ala, moovonya khula enamuna. Munnona? Moone, nyuwo khamunkela mwaha wo olavula ilavulelo. Munkela mwaha wo weettela Masu othene. Eyo ti eyooniheryo ya Erooho Yoowaarya, okathi munaamini anyu Masu a Muluku. Munnona?

¹⁵⁷ Miyo kinnaamini olavula ilavulelo. Kinnaamini wira munoowerya ovahiwa ekumi, ntoko sihimaly'aka voosiis'ula, mpakha vanlavulaanyu elavulelo esya. Miyo kihira, yoomi, ni koosuwela wira Ekeekhai. Koosuwela wira ekeekhai. Masi eyo kehiyo ethooneryo, nyuwo, wira mwa mwaana oothanliwa a Muluku. Munnona? Nnari, nnakhala. Owo khonahimyeke wira...

"Anci-ene animoorwa wa Miyo yiire, 'Pwiya, miyo nkilaleenrye ni wira itthu iya sothene suulupale mwa Nsina Nanyu?' Owo onimwiira, 'Mukhume wa Miyo, nyuwo muniira sootakhala, Miyo nkinatoko woosuwelani.'"

¹⁵⁸ Munoolavula ilavulelo vano nto khunakhootta opatisiwa mwa Nsina na Yesu Kristu? Etthu evonyeiye nipuro nlo. Ayo, vekeekhai; khula emosa wa itthu iyo, khula emosa wa sooruma Muluku ovahaly'awe. Yookhala etthu ehilonke. Mutthokelele akhili anyu paahi, moone etthu—moone etthu Bibilia ohimmyawe. Mukoonihe nipuro nimosa vaavo mutthu opatisiwaawe mwa nsina "n'Atithi, Mwaana, Erooho

Yoowaarya.” Munnona? Khekhanle mmo. Masi, moone, imaara sikina mwaha wa akhili anyu, nyuwo muniira, “Ahe. . .”

Nyuwo muniira, “Muluku onnilavula n’athiyana moota entthuneyaaya awo wira, kahi waawara akaputtula n’itthu sikina, masi, moosuwela, pastore ohimmye wira. . .” Tivo awo ankuxa ephiro yookhweya.

¹⁵⁹ Awo annisuwela etthu Muluku ohimmyawe wa yeeyo Va. Munnona? Vekeekhai, Muluku ohimmye siiso.

Tivo awo—awo—awo antthuna wira yeeyo, khula enamuna, moone. Awo amphavela ophwanya esyakeryo. “Ahe, kinoona wira ti yooreera saana. Kehiyo—kehiyo. . . Etthekeu khenooa. . .” Ayo.

Masi Muluku ohimmye wira mulopwana awareke voovirikana ni muthiyana. “Muthiyana aawanre ekuwo ya mulopwana, yaari yoonanara vamaithoni Vawe.” Tivo kehiyo yooreera, ayo, ni khimwaakhanle wiiraka. Nnari. Munnona? Vano, tivo, ti yoovonyeya.

¹⁶⁰ Masi, moone, awo aneererya ophwanya esyakeryo, wira, “Apwiya akileenle wira kiiroke yeela.” Miyo nkinihimya wira Awo khahimmye, masi, nwehe, kuhiyo otthuna Waya wooloka. Ohaana okhala otthuna Waya woohiyererya. Munnoona etthu enroowaaya wira? Enoohonona etthu yothene. Eyo yaahihonona muttetthe wothene.

¹⁶¹ Nwehe va, Muluku khaarukunxale muupuwelo Awe, Masu Awe. Masi Owo Muluku ooreera murima, ni Owo onimoovahani entthuna murima anyu, enaamwi ekhalaka yoovirikanya otthuna Wawe. Munnaamini yeeyo?

Nkawehani, Muluku aahimuleela Moise, “Murowe iwe,” profeta ola oottikittheliwa. Khwira, “Murowe vale mwalavule ni mwala ole.” Owo waahimaniwa.

¹⁶² Moise khurowa vale ni oviruwa wawe, khukuxa ekopo awe, khwira, “Nyuwo atthu oohiiwelela, ninoowerya okumiha maasi vamwala va?” vano khumana mwala. Maasi khuhikhuma. Owo khumana-tho; khukhuma. Waari woovirikanya otthuna wa Muluku. Eyo yaahihonona khula etthokiheryo mBibiliani; Kristu aahaana omaniwa emaara ya neili. Munnona? Kristu aavulalihiwe emaara emosa. Eyo yaahihonona etthokiheryo yothene. Masi Owo aanvanhe otthuna Wawe woohiyererya. Vano, nuumala, owo khwira, “Moone, hiyo noophwanya maasi. Ayo, miyo kihooruuhelani, nyuwo nikhuru n’atthu oohiiwelela!”

¹⁶³ Muluku khwira, “Murwe va, Moise. Murwe va. Murwe vasulu va. . . Nyuwo munnikhalaka murumeyi eekeekhai.” (Ntoko muthiyana ni maxittha oorakama, “Moowela,” moone.) “Nkawehani iwe. Munnoona muttetthe wa natiri?”

“O Pwiya!”

“Masi khamunrowa ophiya iwe. Mukunxe otthuna Waka woohiyererya, vathi va Vamwala vale. Nyuwo mwiivuwihale mmansinyu, moone, nave kahi Miyo. Nyuwo mwiirerihale mmansinyu. Nyuwo khimukittottopenle Miyo. Nyuwo khimusunke Masu Aka oopacerya, ele koohimenry’akani wira mwiire.” Nnakhala vo, maasi yaahikhuma.

Munoowerya owiixaatherya matata aretta awo anoopenuwa. Nyuwo pooti olaleerya, wala olavula ilavulelo. Masi, etthu ene t’ila, osuka Masu Awe oopacerya! Muluku khonrukunxa muupuwelo Awe, mpatthani. Muhaana osuka woorumani Wawe, otthuna Wawe.

“Oh, ahe, eyo yaari y’awiixutti.”

¹⁶⁴ Owo khanrukunuwa. Vakhala wira Owo nlelo ookhalana mwixutti, iwo orummwa omosaru. “Murowe mulaponi mothene mwalaleye Ehapari yooreera. Ithoonyeryo iya sinimwaatthara ale anrowa waamini.” Eyo khenarukunxiweke. Owo khokhanle orukunuwaka.

Vano, nyuwo pooti wira, “Ahe, kinimooleelani, kahi ya nihiku nenla.” Oh, nyuwo Palaamu! Munnona? Moone, Muluku khanrukunuwa. Owo mmosaru nsana, olelo, ni mahiku othene.

¹⁶⁵ Nkaaweheni aPalaamu olelo. “Oh, koosuwela, mBibiliani wira awo yaapatisa mwa Nsina na Yesu, masi, nwehe, atthu othene. . .”

Nkincala etthu atthu yiiraly’aya. “Khanikhanle Nsina nikina vathi v’Erimu nivaheriwe eriyari y’atthu mukhanly’anyu woopowaka.” “Khiwaavo oleveleliwa wa etampi, vahikhanle mwa Nsina na Yesu Kristu paahi.” Exeeni, moota mury’anyu ooreera murima, etthu muniiraanyu, eyo kherina naata n’iyo. Awo Masu a Muluku oopacerya; muhaana okhala ni Yaawo. Whish! Vaareera.

¹⁶⁶ “Wiiwelela Masu Awe ti wooreera ovikana mukuttho.” Munnuupuwela okathi Sawuli aatthinke-awe.

¹⁶⁷ Palaamu aahikhalana yoovaha ya waamini ni aamuwerya wira orumeenle Masu oopacerya, ooloka a Muluku.

Atthu anci-ene vapuwani olelo, ni soovaha sa ovoniha, yaamuwerya wira etthu emosaru. Atthu anci-ene nno, atthu elavulaka ilavulelo, atthu elaleeryaka s’eprofeta, yoovaha, yaamuwerya orumeelela Omwene wa Muluku, masi awo khaniira. Awo ankuxa. . . Ni Muluku onnaareeriha, mwa khula enamuna, akunxe-ene otthuna woohiyererya. Masi mwaha wo osuweliwa, ni s’opuha, ni soophwanya, aatumihya ihaakhi saya, ntoko Esawu siiraly’awe, moone, aahiitumiherya mutthenkeso. Ahiitumiha, ntoko Palaamu siiraly’awe. Munnona?

Anci-ene aniira etthu emosaru olelo. Hiyo noosuwela wira eyo ekeekhahi. Awo anootumiha ihakhi saya s’eyuulupale. Huh! Athiyana anihimya Erooho Yoowaarya, yaawaraka akaputtula;

alopwana yaatthuniheryaka vapulpitu, athiyana oomettha maihi mpulpituni; oowiipintari wiitho, awanre-ene malaya a etiini. Nluku nuulupale nookwattula ekereja etonko aya okhalana.

¹⁶⁸ Mwaatthunaka osuwela, mwa ikuru sa poliitika, okathi xeeni ula ory'aya okathi wa omwene, moone vatthu aYuta vary'aya. Nwehe moota aYuta ary'aya, okhala wira awo nloko nimosa. Mwaatthunaka osuwela vatthu ilapo siphwanyaneyaaya, mwaawehe aYuta.

Mwaatthunaka osuwela vatthu ekereja emphwanyaneyaaya, mwaawehe athiyana. Nkawehani olakeya eriyari y'athiyana, okhala wira muthiyana ti ethooneryo ya ekereja. Nyuwo moonaka opahuwa eriyari y'athiyana, munoophwanya opahuwa mukereja. Etthu owo ophiyenryawe okhala, Yesapeli oowiipintari, vekeekhai yeeyo ekereja ephiyenryaya okhala. Munnona? Vano, eyo ekeekhai, ni nyuwo moosuwela eyo. Munnona? Mwaatthunaka osuwela vatthu ekereja varyaaya, nwehe olakeya eriyari y'athiyana anyu. Okhala wira, owo ti, ekereja muthiyana.

Mwaatthunaka osuwela ekhalelo ya mulaponi, mwaawehe aYuta.

¹⁶⁹ Nwehe, siiso Muluku aamuhimenryawe Palaamu, vaamanly'awe wiiwa Masu oothikila a ehimeryo ya ekeekhai, "Muhirowe." Ayo, nto Owo khimuhimeerya, vamanly'awe woona mmu—mmurimani mw'awe, etthu aatthunaawe wira; Owo aahinvaha otthuna Wawe woohiyererya, tivo Owo khwira, "Muroweke."

¹⁷⁰ Nto nyuwo mwaamuwerya wira etthu emosaru. Mwaahitthuneki weetta mw'Ekeekhai, munoowerya orowa okhalana—okhalana muteko muulupale. Vekeekhai, munoowerya. Masi nyuwo munkuxa otthuna Wawe woohiyererya. Nyuwo muneetta vasulu va Masu Awe. Owo onimookelelihani ohoolo, tthiri. E. . .

Siiso ntoko Owo saamwiireny'awe Palaamu. Owo aahikhalana mureerelo, masi khaawerya waatakhalaha atthu ale. Owo khaawenrye wira. Okhala wira, khula okathi owo aapaceryaawe waatakhalaha, aamwaareeriha. Moone, owo khaawenrye wira. Masi vanaasiwa oreeriwa mwa yoowiira awe, owo aahaaxuttiha atthu awo, mwaha wa Palaki, oruraruwa. Owo aaruuhale vapuwani va Isarayeli khwaatheliha, khwira, "Vano, hiyo othene na mmosaru. Vano, munimukokhorela Muluku mmosaru. Nookhalana profeta nno, ni nyuwo mookhalana profeta iwe. Ni hiyo nirina mukuttho mmosaru, Yehova mmosaru ntoko axitiithi ahu. Vano, muhinirweela-ni nyuwo othene mupatthana ni hiyo?"

Bibilia ohimnye wira, "Muhiitakanihe eriyari y'alipa-oohaamini. Muhiitthukele muritti n'awo, nnakhala. Awo yaahaaminiki, mwiivalaanihe ni yaawo." Munnona?

“Mukhume, mwiivalaanihe,” anihimya t’Apwiya, “nto Miyo kinoowaakhelani.” Munnona? “Muhikwannye itthu saya soonanara.” Ti yeeyo. Soonanara saya sinvirikanya Masu, n’itthu siiso, mwihuluxe. Muhiiwelele yeeyo.

¹⁷¹ Ni va hiyo ninnoona wira Palaamu aahirowa iwe khupacerya waaxuttiha atthu, ni owo aahiruha yoonanara. Ni owo—owo aathanre ephiro ya Palaamu, moota siiraly’awe, ni aahimwiixuttiha Palaki, ni aana a Isarayeli oraruwa. Vano ehasara yaahaaphwanya nloko na Isarayeli, atthu, ikonto sene yaahikhwa nihiku nimosa.

Nto awo othene aryeene weiwe, ohoolo wa altaari a Muluku, avekelaka, va onoorwa mulopwana mmosa mwIsarayeli ni muthiyana a oMitiya, muthiyana a mmuromoleloni, khuvolowa muheemani. Nto mwaana a namukuttho khurova vale, khukuxa ntthere khumwiiva. Nto eyo khumaaliha oviruwa wa Muluku. Nyuwo moosuwela wira eyo ti Yoolempwa. Eyo ekeekhai? Munnona?

¹⁷² Masi exeeni yiiraneieye? Palaamu, owo aahiwerya omuttettheiha Isarayeli. Owo iirale exeeni? Owo aatteettheihale muttetthe aya. Muluku aaroomutthuniherya orowa khutteettheiha muttetthe aya, nto khupahula muttetthe wothene.

Ni okathi mwiixuttiho onipaceryaaya, ohikhanle Ekeekhai ya Bibilia, onohonona muttetthe wothene. Mutthu onvenya ni muupuwelo woovirikana, ntoko Kore, ni wira, “Ahe, *ela, ele*, ni *ekina*, ni kookhalana muupuwelo woovirikana,” onoonanariha muttetthe wothene. Nto eyo ti ele yiireiye vapuwani wothene va ekereja olelo. Ti yeeyo.

¹⁷³ Wiixuttiha ntoko siiraly’awe, otteettheiha muttetthe wothene wa oKadexi-barne, mutharamulo wa Masu. Vaaphiyale- aya oKadexi-barne, nto, waari otteettheya wa muttetthe. Awo yaahithika. Awo yaaroorowa ottuli. . .

Muupuwele, awo yaahilya yolya ya malaikha. Awo yaahikhalana Masu a Muluku, khula ohiyu, owoonihiriwa. Ni awo yaahilya yolya. Awo yaahiwurya vamwala. Awo yaahiira sothene, yaahoonna miiriirya. Awo yaahinweha Moise, ni yaahoonna nuulumo nawe, yaahoonna olaleerya wawe s’eprofeta, itthu sothene.

Vano nto vookiserya vamwiwalyaya muxuttiha ola oowootha, aakenle eriyari aya waaxuttiha yoonanara, owo aahitteettheiha muttetthe, ni aahireeriwa ni yeeyo.

Khino siiso aahiteka ipa sa itoolare imilyawu sene. Owo khino aahikhalana miromolelo suulupale. Owo khino aahaacererya ikonto vaara ikonto sene, ni ovara miteko suulupale, ni miteko sa ikuru, ni aari profeta. Eyo eri saana, masi, vakhalaru wira khekhanle ni Masu a Muluku, vanreerela mwihuluxe eyo.

Muluku khonrukunxa muupuwelo Awe. Mukhale voolikana ni Masu Awe, okhala wira ti yeeyo enrowa okhumelela wookiseryani, Masu, Masu ni Masu. “Ole onrowa okumiha Nuulumo nimosa Mmo, wala waacererya nuulumo nimosa Mwemmo!” Ahaana okhala, Masu awo.

¹⁷⁴ Vano nwiriyane oratteene vano. Varwiiyaaya wehereriwa wa Masu, varonwe-aya iwe khumoono nwanani muulupalexa, nwanani muulupalexa awo yaatonko aya omoona, Amaleki yaari—yaari oowunnuwa vaara muloko. Awo yiirale, “Hiyo ninkhala ntoko isoope. Makokoro aya, ahiiso ipooma saya ti sootekeleliwa makokoro saana mpakha anweryaaya otthimaka ni ikaaro vasulu va exiri, ikaaro piili, yiilipihaka vanweryaya, muxirini, moone, sa ipooma saya. Vano, mavaka aya, t’orakama saana. Ni awo t’okorosowa. Vano, hiyo ninkhala ntoko isoope. Khaninwerya wira.”

Nto axilopwana aili khukhala ooweemererya Masu awo, Kalebi ni Yoxuwa, khwira, “Nwehererye minuutu mmosa! Nyuwo atthu imilyawu piili mmaale minuutu mmosa paahi. Hiyo ninniweriyaxa wira. Moone, hiyo niri ntoko nwanani oophwanela wa awo.”

Awo yaalipa ni exeeni? Muluku iirale, “Miyo kihoovahani muttetthe. Ti wawinyu.” Ni yaahilipa vaavo. Masi atthu yaahithelana, eriyari ya itthu sikina, ni inamuna sothene sa iyaaminelo ni meera eriyari aya, ni yaari ootteettheya, oovolola, khiyaasuwela ephiro xeeni yo otthara ni etthu yo wira. Eyo ekeekhai. Vo khurwa wehererya wa Masu.

¹⁷⁵ Nave, Owo onimootthuniheryani wira, onootthuniherya otthuna wanyu, otthuna woohiyererya, osuwelaka...Eri mmurimani mwanyu, Owo onnisuwela.

Nyuwo muniira, “Ahe, Munna Branham, miyo kiniira *elexe n’ilexe*. Eyo khenikihaaxa. Muluku onnikireeriha khula nihiku. Kinniipa Muroohoni. Kinniina Muroohoni. Miyo...” Owo onootthuniherya. Mukeleleke ohoolo. Ti yeeyo. Masi munrowa wira exeeni?

¹⁷⁶ “Miyo kinnaawara akaputtula, ni kinniira *ela*. Khenikihaaxa. Koosuwela wira waamini waka ori mwa Kristu, kahi mwa ele enwaraaka.”

Masi, Bibilia ohimye wira yookhala etthu wa yeeyo. Munnona? Munrowa wira exeeni? Munrowa okhaliha nluku nookwattula, ntoko Palaamu siiraly’awe, ohoolo wa khula mmosa w’athiyana akina. Enrowa okumiherya exeeni mw’axiruusi anyu? Munrowa okhalana nikhuru na maRicketa, eyo ekeekhai voolikana, nikhuru na maYesapeli oowiipintari. Munnona?

¹⁷⁷ Masi Muluku onoowaacereryani. “Vano, Owo onnikireeriha.” Miyo nkinihoverya eyo. Owo aahimureeriha Palaamu, nave. Munnona? Vekeekhai Owo onimwiira. Nyuwo muneetta

vootthuna Wawe woohiyererya, kahi otthuna Wawe wooloka. Muluku khonrukunxa muupuwelo Awe, okhala wira Owo onnooreerihani.

Owo aahimureeriha Isarayeli iwe miyaakha miloko mixexe. Awo yiirale exeeni? Yaahaathela axaar'aya, yaahaalela amusi, yaahapecari anamwane, yaahiliva sanamuloko, yaahikhala weiwe. Ni Muluku aahaareeriha mothakoni, aahaalyiha emana, ni itthu sinci-ene. Ni khula mmosa a yaawo aahipweteya, okhala wira awo khiyaasunke yooloka Awe, woohiyererya. . . otthuna Wawe woopacerya, Masu Awe. Awo yaakuxale ephiro Awe yoohiyererya.

¹⁷⁸ Mukeleleke ohoolo, masi, muupuwele, okathi awo akhummy'aya oKadexi, khiyaaronwe ottaiwene. Awo yaamwiirukurerya paahi, mothakoni. Vaavo, awo yaakhanlyaya overyaka okhuma, mahiku maili nuumala yeeyo, vaamuweryaneya okhala muttethe wa natiri. Awo yaaheetta mukwaha miyaakha miloko mixexe, ni khula mmosa a awo aahikhwa omuhiya Yoxuwa ni Kalebi, ale yaahanle mwa Masu oopacerya.

¹⁷⁹ O Muluku, munikhaliherye. Muluku khonrukunxa otthuna Wawe. Owo khonrukunxa muupuwelo Awe, masi Owo onimooreerihani.

Vekeekhai, Owo aahimureeriha Palaamu. Nto owo iirale exeeni ohitto iwe? Owo aahipahula muttethe wothene. Moone, muhaana okhala mwa ele Owo ohimmyawe. Owo khonarukunxeke etthokiheryo Awe yoopacerya.

¹⁸⁰ Vano nkaaweheni aPalaamu oolelo, vapuواني, mwaawehe. Nwehe paahi. Ekelelaka ohoolo, alavulaka ilavulelo, vekeekhai, erumeelasaka yoovaha ya Muluku wira ephwanyeke itthu, sothene, vekeekhai. Masi eyo enninanariha ekereja yothene ya Muluku ni mwiixuttiho aya woonanara. Ti yeeyo.

Mmosa aahikiirela, owo khwira, "Muniirela-ni *ela*? Muniirela-ni *ele*?"

Miyo khwira, "Khimunaamini wira Eyo Ekeekhaii?"

¹⁸¹ "Oh, ayo. Masi," owo khwira, "moosuwela? Owo kuhiyo mwah'anyu. Muhaana waavekelela aretta. Awo anaamini wira nyuwo mwa profeta. Vano, mwaamuwerya owiixuttiha athiyana awo moota wo, n'alopwana awo, moota wo wira *ela, ele, ekina*."

"Munwerya sayi owiixuttiha alixepa awo hata ehimwiixuttaka ABC aya? Hah? Hah? Munwerya sayi owiixuttiha itthu iyo ahikuxaka hata yoopacerya?" Munnona? Muhaana otthikela ottuli n'upacerya vatthu vapacenry'anyu, wala otthu mukhumme anyu mphironi, ni okuxa Masu othene a Muluku.

¹⁸² Nkawehani paahi mmapuwani olelo. Ntoko Palaamu aamuthelin'he-awe namuttompe, ni ekereja ya Muluku,

aamuthelin'he namuttompe ni ekereja ya Muluku, siiso t'awixuttihi ala oowootha olelo aneererya woohimeeryani. Awo anoorowa otheliha khula mmosa wa mitthenkeso iya ni atthu ala ni namuttompe a Wiisuupulula 17. Mwiixuttiho aya wa Palaamu oneettasa iwo olelo, ni wira, "Hiyo na mmosaru paahi. Hiyo othene n'aKristu." Ni anamukuttho ni mapaapa, ni sothene, yiisakalelihaka ni yiiraka ela.

¹⁸³ Mulaleyi khwira...Hata kinnimusuwela mulaleyi mmosa muPentekosite, othene aya, vano aapacerya omukawa ooxitiya oovilikeya. Yeeyo enihimya, *Astarti*, "muluku a mweeri," ooxitiya kosher. Aniira, "Mphunye maitho mmwaakhele, yaasikulihaka muupuwelo anyu." Mphunye maitho anyu? Ooxitiya oovilikeya, enihimya exeeni? Hiyo ninaakhela erutthu yookheriwa, Yesu Kristu, yoonyaanyiwa; kahi muluku a nsuwa oovilikeya, *Astarti*, yoowo Maria okhanlyawe voopuroni vawe. Ni ooxitiya a oRooma t'ovilikeya, wa muluku a mweeri, muluku muthiyana, kahi muluku. Hiyo nirina kosher oonyakattiwa, vekeekhai. Oh!

¹⁸⁴ Tivo vano namararuwa muulupale a Wisuupulula 17, awiixuttihi ala aPalaamu ni mwiiixuttiho aya woowootha, antheliha ekereja mwa enamuna yeeyo ya evitikavitika. Nwehe okathi enrowaaya ophiyerya wooniheriwa okathi wookiserya, nwehe otteettheya waya vano. Mitthenkeso imiya thanu na xexe n'itthu soohiyana-hiyana, mmosa opurulelaka epantte emosa, ni mmosa epantte ekina. Khiwaavo wiiraana yaawo-ru. Nto awo aneererya oruaha wiiraana; ohinlipiheriwa ni Masu a Muluku, etthokiheryo yoopacerya ya Muluku. Awo ankelihani ipoliitika ni mutthenkeso.

Muluku khonrukunxa muupuwelo Awe. Owo onikhala ni Masu Awe. Owo iirale, "Erimu n'ilapo ya vathi sinoovira, masi Masu Aka khanvira." Ti yeeyo. Owo onikhala ni Masu Awe oopacerya. Oh, wulu!

¹⁸⁵ Anaamwi awo nlelo yaanyiheryaka Yaawo, siiso awo siiraly'aya, ni paahi...Eri etthu emosa paahi yo wira. Owo khonrowa orukunxa Yaawo. Mwaamini paahi. Okhala wira, erimu n'ilapo ya vathi sinoovira; Masu Awe khankhalakhala avonyaka. Munnona?

¹⁸⁶ Munnoona etthu munthelanaanyu? Munnoona ipoliitika n'itthu siiso, moota awo aneerery'aya otakaniha ikereja vamosa ni ipoliitika mukereja? Hiyo khaniniitakaniha ni Kristu ni ipoliitika.

Hiyo nniitakaniha ni Ekereja, ni Kristu, ni opatiiso wa Erooho Yoowaarya. Nto enamuna yo osuwela opatiiso wa Erooho Yoowaarya, okhala wira Erooho eyo mwa nyuwo ennisuwela Masu othene a Muluku okhala Ekeekhai. Ti yeeyo. "Maana ole onrowa okumiha Nuulumo nimosa Mmo, wala waacererya

nuulumo nimosa Mmo, mpantte awe onookumihiwa Muliivuruni mw'Ekumi.”

¹⁸⁷ Hata, “Owo akhalaka saana,” nyuwo munoohimya. Khimukhanle waaminiki muttharihaka okhala saana. Khimukhanle omutthokelelaka Muluku mwaha wo okhala saana. Olumwenku onnikhala saana. Palaamu aahikhala saana ni yoowo.

Masi, munna, nyuwo munimutthokelela Muluku ni Masu Awe. Owo onnimaliherya Masu Awe ni onnisuwanyeiha okhala Ekeekhai. Tivo, muupuwele, mpatthani, mwaakhalakaru mukumi, muhikhalakhale muliyalaka ela: Muluku khonrukunxa muupuwelo Awe. Nnya, Owo onimooreerihani. Owo onimoohiyani otthikela otthuna Wawe woohiyererya, masi Owo khonrowa orukunxa muupuwelo Awe. Owo khonrukunxa mutthokiheryo Awe. Owo khonrukunxa Masu Awe, mwaha wa nyuwo. Nnari, mulopwana.

Muhaana orukunuwa. Khamukhanle okhalanaka Masu a Muluku wira elikaneke ni musuwelelo anyu; muhaana wiiriha musuwelelo anyu olikana ni Masu a Muluku. Munnona? Ti siiso murinaanyu o . . .

Nyuwo muniira, “Ahe, miyo ka mutthu ooreera murima. Muluku onniira *ela, ele, wala ekina.*” Masi munniiwelela Masu Awe? “Oh, ahe, kinimooleelani, eyo kahi paahi . . . Nnari.” Vaareera, yookhala etthu evonyeiye nipuro nlo. Muluku onoorowa . . . Ayo, Owo onimookelelihani ohoolo. Vekeekhai, Owo onimookhalihani . . .

¹⁸⁸ Miromolelo sinookelela ohoolo saana-ene! Awo annookola iheema saya, ikereja suulupale, sooreera, ni sothene, mulaponi mothene. Awo mathaaciri, ni musurukhu okelaka wowaatta, ni mamempuru mapuro othene. Bibilia khohimye wira, “Saahiphwanyiwa mwa yoowo mihakhu sa molumwenkuni, ni hata minepa s’atthu,” ni itthu sothene, saaphwanyiwe mwa namuttompe ola, yoowo okhanle maama a etthu yothene, ipoliitika ni mutthenkeso?

¹⁸⁹ Masi nikhuru naamukhaani na Muluku ti Mwaakameliwa Awe, oocaliwa mwa Masu awo. Atithi oophentiwa a Wirimu okathi wothene yookhaliheni oolipa vaavo. Muhikhalakhale mukhumaka Mmasuni mmo.

Siiso mureerihaka, nyuwo pooti . . . Muluku pooti waavoniha aretta anyu. Owo khino onoonvoniha mwan’inyu onwereiwa. Owo khino onimwaavoniha aiy’anyu, amwaar’inyu. Owo khino onimwaavoniha ame anyu, mutthu mukina. Nyuwo pooti otupha mwa Erooho Awe, ni wiina nno ni nno.

Muupuwele, epula ennimurupela naxariya ni ootakhala, vamosaru. Masi epyo ele yaaphwanyaneyaka vale, ti yoothokiheriwa ahiiso ti yoothokiheriwa. Nto yakhala yoothokiheriwa enoowerya . . . Yakhala etriku, ehaana wiima

etriku. Yakhala Masu a Muluku, ehaana okumiherya Masu a Muluku. Yaahikhale, ahe, weeso kehiyo. Munnona? Munniiwa saana yeeyo vano?

¹⁹⁰ Apwiya yooreeriheni. Va miyo kaahooleelani wira kaarowa omaliha ewoora ya neethanu na xexe, nto ela va, sinihala minuutu miloko miili wira ephiye ewoora yanamuluko. Anci-ene a nyuwo atthu, muhaana mukwaha murowaka ottaiwene. Miyo kinnoophentani. Ni mwaha wa yeeyo miyo onoovarelelaakani siisa, kahi mwaha wo wira kintthuna kikhale ootakhala murima wa nyuwo, masi miyo kinnoophentani. Vansuwelaaka, miyo nkinihiya etthu; miyo kinooleelani Ekeekhai.

¹⁹¹ Wu mmithukumanoni onrowaaka, khamunikiiwa olaleerya Mitthaka iya. Nnari, miyo kihoomanelani natiri, wira kaamurwa etapernakulu ila. Vaava va ti nipuro kinlaleyaakavo Mitthaka saka. Kookhalana miraru wala mixexe va, Apwiya akivahaly'aya, kihaana Soolempwa mwa seiyo, wira nkaarowa weererya olaleerya khula nipuro nikina noohikhala vaava. Va ti vatthu Masu a Muluku apacenry'aya okhuma. Nto, mpakha Muluku arukunxe, miyo kinookhala vaava ni olaleya va. Ti yeeyo.

Wu mmithukumanoni, kinaavekelela aretta, ni itthu sothene siiso; ni, ipante, kinihimya itthu mwa enamuna yoohiluluwanya, wira ipwittipwitthi siiwe. Awo annisuwela etthu enihimyaaya. Mwa enamuna ekina, eyo campo vacooloni, moone. Miyo kinnoona ithoonyeryo so—so ophavela wooniherya wira Muluku onnisuwela, mwa olamula sa mmurimani, ni onnisuwela mirima s'atthu, ni onniira itthu iya. Eyo ti yoovaha ya onamalaleya, wira yaatannye atthu paahi.

Naanaanoru, efiita enookela mpaani mwaya. Ti yeeyo, nto. Owo akhala epwittipwitthi, onoorwa ottharaka. Akhala epuri, owo onooriha efiita. Uh-huh. [Munna Ben Bryant oniira, "Ni nyuwo, nave."—Mol.] Moone, eyo ti. . . "Ni nyuwo, nave," ti yoolikana, Ben. Eyo, eyo ekeekhaii voolikana. Ben ookhalana musuwelelo. Vaareera. Ahe, eyo ekeekhaii.

¹⁹² Khamuntteeliwa murima nyuwo okhala Awawe? Khamuntteeliwa murima? Naaniipaka nsipo nimoso naamukhaani na Pentekosite, khalayi, ntoko:

Kootteeliwa murima Apwiya okoopola;
Kootteeliwa murima Apwiya okoopola;
Vahaari mwaha wa Yesu, kaarowa okhala vayi?
Kootteeliwa murima Apwiya okoopola.

Oh, kinnitteeliwa murima okhuma okathi
Apwiya akooonle aya;
Kinnitteeliwa murima okhuma okathi Apwiya
akooonle aya;
Vahaari mwaha wa Yesu, kaarowa okhala vayi?

Kinnitteeliwa murima okhuma okathi Apwiya
akooponle aya;

Miyo kinnikhuwela okhuma okathi Apwiya
akooponle aya;

Miyo kinnikhuwela okhuma okathi Apwiya
akooponle aya;

Vahaari mwaha wa Yesu, oh, kaarowa okhala
vayi?

Kootteeliwa murima Apwiya okoopola.

Ovuwa! Khamutteeliwe murima?

Khamutteeliwe murima . . .

Nrowe niipe.

Kamutteeliwe murima Apwiya owoopolani?

Kamutteeliwe murima Apwiya owoopolani?

Vahaari mwaha wa Yesu, oh, kaarowa okhala
vayi?

Kootteeliwa murima Apwiya okoopola.

Ahe, kinniipaka okhuma okathi Apwiya
akooponle aya;

Kinniipaka okhuma okathi Apwiya akooonle
aya;

Vahaari mwaha wa Yesu, oh, kaarowa okhala
vayi?

Kooteeliwa murima Apwiya okoopola.

Kamutteeliwe murima? Nto *ninrowa Weetta Mowaaryani*.
Munnisuwela nsipo nlo?

Ninrowa weetta Mowaaryani, Waarya
wooreera,

Onrwa vaavo mattottoi a okame wa ikharari
anaary'aya;

Anaarya mwa hiyo othana ni ohiyu,

Oh, Yesu, Waarya wa mulaponi.

Nyuwo khinnoosivelani nenlo? Nrowe niipe-tho.

Ninrowa weetta Mowaaryani, Waarya
wooreera,

Onrwa vaavo mattottoi a okame wa ikharari
anaary'aya;

Anaarya mwa hiyo othana ni ohiyu,

Oh, Yesu, Waarya wa mulaponi.

Ti okhuma wa nsuwa!

Nyuwo masantu othene a Waarya mulaleye,

Yesu, Waarya wa mulaponi;

Ekeekhai ni omoreliwa ikharari mwa Nsina

Nawe,

Yesu, Waarya wa . . .

Vano nrowe nivenxe matata niipaka nenlo.

Oh, ninrowa weetta Mowaaaryani mu, Waarya
wooreera,
Onrwa vaavo mattottoi a okame wa ikharari
anaary'aya;
Anaarya mwa hiyo othana ni ohiyu,
Yesu, Waarya wa mulaponi.

Nvahane matata mmosa ni mukhwaawe.

Oh, Onrwa vaavo mattottoi a okame wa
ikharari anaary'aya.

Khamutteeliwe murima nyuwo okhala aana a Mowaaaryani?
Mwaana ookhuma.

. . .mwa hiyo othana n'uhiyu,

“Axinamwane, mphentaneke mmosa ni mukhwaawe.”

Oh, ninrowa weetta Mowaaaryani, Eyo ti
yooreera saana... (Wooniheriwa wa Masu
Awe.)

Onrwa vaavo mattottoi a okame wa ikharari
anaary'aya,
Anaarya paahi mwa hiyo othana ni ohiyu,
Ti Yesu, Waarya wa Masu.

Nyuwo othene munnaamini?

Ninrowa oSiyoni,
oSiyoni, wooreera saana;
Ninrowa oSiyoni,
Muttetth'ole wooreera wa Muluku.

Oh, ninrowa oSiyoni,
Mwaahiye ale anikhoota wiipa
Yaawo ahinatoko omusuwela Muluku ahu;
Masi aana a Mwene a Wirimu,
Nto masi aana a Mwene a Wirimu,
Anoowerya ohimya otthapa waya,
Anoowerya ohimya otthapa waya.

Maana hiyo nineetta . . . (Ovuwa!)
oSiyoni, wooreera saana;
Oh, ninrowa oSiyoni,
Muttetth'ole wooreera wa Muluku.

Oh, ninrowa oSiyoni,
Oh, oSiyoni, wooreera saana;
Ninrowa oSiyoni,
Muttetth'ole wooreera wa Muluku.

¹⁹³ Mukuxe nleeso nanyu. Mukumihe maleeso anyu, minuutu mmosa paahi. Nrowe naavahe Apwiya mukuttho woohakhinyiwa. Kehiyo ehupu, masi yaanikuxiwa okhuma veerutthuni va Paulo maleeso ni itthu, moone.

Oh, ninrowa oSiyoni,
 Oh, oSiyoni, wooreera saana;
 Ninrowa oSiyoni,
 Muttetth'ole wooreera wa Muluku.

Oh, ninrowa oSiyoni,
 Oh, oSiyoni, wooreera saana;
 Ninrowa oSiyoni,
 Muttetth'ole wooreera wa Muluku.

¹⁹⁴ Amen! Oh, eyo kheniwoonihani oreera? Kinniwerya waatthokelela masantu ale a khalayi, ahinatthi okela musirkuni ya oRooma, epaceryaka owela ntumuxa nle, moosuwela, etturu ele ekhaani, arowaka mulittini mwa amwatto yiraka:

Oh, ninrowa oSiyoni,
 oSiyoni, wooreera saana;
 Ninrowa oSiyoni,
 Muttetth'ole wooreera wa Muluku.

Imatta sa oSiyoni sinnikumiherya
 Soosiva soowaarya ikonto sene
 Nihinatthi ophiyerya Ehice ya Wirimu,
 Nihinatthi ophiyerya Ehice ya Wirimu,
 Wala weetta iphiro sa weero,
 Wala weetta iphiro sa weero.

Ninrowa oSiyoni,
 oSiyoni, wooreera saana;
 Ninrowa oSiyoni,
 Muttetth'ole wooreera wa Muluku.

¹⁹⁵ Muthikele nuumala miyo:

Pwiya Muluku, miyo kinniivaha-tho mmansaka wa Nyuwo. Mukirapihe sootakhala sothene. Mukikumihe ohoverya wothene Masu Anyu. Mukitthuniherye, okhuma Paasikha ola, kikhale yoopattuxiwa esya mwa Kristu Yesu. Mukihiye kikuxe, mmurimani mwaka, Masu Anyu. Akhale Muthuko munawoni mwaka onrowa omwaleela ephiro aka. Okhuma vano mpakha ohoolo kinimoottharani. Mwa Nsina na Yesu. Amen.

Ninrowa oSiyoni,
 Oh, oSiyoni wooreera saana;
 Ninrowa oSiyoni,
 Muttetth'ole wooreera wa Muluku.

¹⁹⁶ Eyo kheniwoonihani oreera? Nihiivahererya-tho mmansihu, nisuwelaka wira mmurimani mwahu noovahiwa ekumi okhuma mw'alipa-ookhwa, khukhalihwiwa akumi. Eyo kheniwoonihani oreera? Wulu, oh, wulu! Miyo kinnoophentani, ni ophenta ohinkhwa.

Nwiriyane. "Mphentaneke mmosa ni mukhwaawe. Maana khimukhanle omunyokhaka munn'inyu, nyuwo munimoonanyu, ni ohimya wira munnimphenta Muluku,

Yoowo muhimoanly'anyu." Munnona? Tivo mphentaneke mmosa ni mukhwaawe.

Vano, mwaarumeelanaka mmosa ni mukhwaawe, munimurumeela Muluku. Eyo ekeekhaii? "Eniwiirelaanyu mmosa wa axikhaani ala arina Owerya woovaha ekumi mwa yaawo, mukiirenle Miyo."

"Naawonneni liini muthoiwe? Nooxekunryeni liini mutthukweliwe? Niirale liini itthu iya?"

"Saawiirenlyanyu awo, nyuwo mukiirenle Miyo."

¹⁹⁷ Eyo kahi yooreerexa? Miyo kinnimpenta Owo, ankhinyuwo?

¹⁹⁸ Oh, nookhala nsipo nimosanihaana wiipa, mwakhalanarutho minuutu mmosa paahi. Oh, ahe, hiyo nnimwaakuxa paahi. Vaareera. Vaareera, mulopwana. Oh! *Mukuxe Nsina Na Yesu Ni Nyuwo*. Muhiliyale eyo, apatthani. Nrowe othene niipe vano. Khula mmosa, vamosa vano, ni murima mmosa paahi muulupale, mmwiipele Yoowo. Niipe, ni sothene sirinaahu mwa hiyo.

Mukuxe Nsina na Yesu ni nyuwo,
Mwaana a mixankiho ni ooriipiwa murima;
Nlo nnimoovahani otthapa ni olipa,
Mukuxe Nenlo mapuro othene onrowaanyu.

Nsina nooreerexa, O noosivela!
Nroromelo wa mulaponi ni otthapa wa Wirimu;
Nsina nooreerexa, O noosivela!
Nroromelo wa mulaponi ni otthapa wa Wirimu.

¹⁹⁹ Muupuwele vano, mukivekelele saarumaka ittheke sooviha so olupatthiwa, okathi axetwani ipantte sothene antuphelaaya, Miyo kinimuupuwela wira nyuwo munnikivekelela ohiyu ni othana, nto miyo kinookhala kooevekelelakani.

Mukhale ni pastore anyu ooreera murima, Munna Neville, ni muxirikha, Munna Capps. Nwiweleleke. Awo anoowiixuttihani Masu a Ekumi. Miyo kinnaamini yeeyo. Kahaamini, vekeekhai nkaarowa okhalana awo va. Vekeekhai nkaarowa. Kinnaamini wira awo annaamini Mutthaka, ni ankhala ni yoowo vooreera sinsuwelaaya, ni kinniwaamini axilopwana awo oowaili. Mukhale ni yaawo. Axinna ala akina, weiwo awo ankhalanayawo muthukumano aya, yeemenle va ohiy'ula, nyuwo mwakhala anamwaattamanani aya, mukhale vakhiviru ni yaawo. Muhiiwa ethu arweenle-aya va, ohiy'ula.

Mukuxe Nsina na Yesu ni nyuwo,
Ntoko Mwaakiheryo wa khula ntapha;
(Nwiriyaane ela.)
Ottehattehiwa woorukureryani,
Muromole Nsina nenlo Noowaarya ni
mavekelo.

Nsina nooreerexa, (Nsina nooreerexa!) O
 noosivela! (O noosivela!)
 Nrromelo wa . . .

Muluku Ootthuneya, mwaavonihe atthu ala. Miyo
 kinoovekelani Nyuwo, Tithi, mwa Nsina na Yesu. Munivahe,
 Pwiya, miyo kinnivekela.

. . . O noosivela!
 Nrromelo wa mulaponi ni otthapa wa Wirimu.
 Mpakha nikumane! mpakha nikumane!
 Mpakha nikumane munawoni mwa Yesu;
 Mpakha nikumane! mpakha nikumane!
 Muluku akhale ni nyuwo mpakha nikumane-
 tho.


Nrowe nuuramihe muru vano.

[Munna Branham oniipa muhina-muhina *Muluku Akhale
 Ni Nyuwo*—Mol.] O Muluku, mukhale ni hiyo. Munikhaliherye,
 Pwiya.

. . . nikumane munawoni mwa Yesu! (Mpakha
 nikumane!)
 Mpakha nikumane! mpakha nikumane!
 Muluku akhale ni nyuwo mpakha nikumane-
 tho.

²⁰⁰ Vekeekhai ti mavekelo aka. Mpakha nikumane-tho, Muluku
 ooreeriheni! Nto vano kinrowa onvekela Munn'ihu ooreera
 murima Neville vakhala wira onoolaiha muthukuman'ola
 wooreera.

Muluku onnoophentani, khula mmosa. Miyo kinnixukhuru
 saana okhalana atthu ntoko nyuwo othene. Mutthaka aka
 waarowa okhala exeeni kahaarina mutthu aarowa waamini?
 Ni aakhala atthu va, mwaarowa okhwela Yoola, Mutthaka ola
 orinaahu. Muluku ookhaliheriyeni, khula mmosa. Mavekelo aka
 ari ni nyuwo. Iparakha saka sirowe ni khula mmosa a nyuwo.
 Muhiliyale wira nyuwo mwa epannte ya ohihimuwa iwo. Owerya
 woovaha ekumi ori mwa nyuwo vano. Sothene soolakiheriwa.
 Nyuwo mwa mwaana a Muluku.

Nrowe nuuramihe muru, mpakha Munna Neville anilaihe. Ni
 Muluku ooreeriheni. 

65-0418E Muluku Onnirukunxa
Muupuwelo Awe Vanaasiwa Masu Awe?
Branham Tabernacle
Jeffersonville, Indiana wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org